

Basef Amama Jisas Krai Nih'i'ambamanam Jon Ma Amamaga Anona Nemaf Mig'i Meatagai

Basef bandami Jisas Krai nih'i'amba Jon ma amamaga migi' meatagai

- 1:1-8 Jon nanda' basefa na'oh nandondo'oh natolomi mafe'ma esis sios
7-peleim nafela agel Jisas Kraisi lu'una
- 1:9-3:22 Jon nati Jisas Krai nafifil endilisi ea' nanda' basef ananiami
mafe'ma esis Kristen hiesi sape sios 7-peleim
- 4:1-8:1 Jon nati heven ilif nati Jisas Krai naloma Ahalomana God
maloma ensel hiami ea' nati Jisas natagaha tep 7-peleim
- 8:2-11:19 Jon nati ensel 7-peleim mufapula alelef mandandam
- 12:1-13:18 Satan anona nemaf nopa' noloma ensel Godi hiami
mili'amonana nisila'i etap anae'
- 14:1-15:8 Jon nati Jisas anona nemaf nondati si'i sipsip noganai
noloma ensel wanom moha epes sowa' alafugaha Godi kwapete'as
- 16:1-21 Jon nati anom ensel 7-peleim mahapila maloh mandandam
- 17:1-19:21 God anona nemaf nogwamasa waf aonai epes isima
wambel Babilon, ea' Krai nifi'i nandati si'i aman natoma hos
afitinai nafi'i
- 20:1-20:15 Satan nanda' kalabus nope hul launai la'ela'ef hihif, ea'
God nowaloga epes hiesi
- 21:1-27 Jerusalem dambaiguma
- 22:1-6 Walemb ambal namunai napaimi maloma lawah mola su'utip
bu'wami epes sagwa'am sefa' ambagof namumi
- 22:7-21 Basef Jisas Krai akutaimi nofala epes hiesi sifi'mai Anan

1 ¹Fowa' gani basef amama mape mandambaho' ea' dei'
Jisas Krai nanda'am mandawalap alihim. God nase'anam

Jisasa nowalapam nihi'ambapa anom manda'mana opeh Godi ma mowalapa amamaga mape mandambahi'i motaga ulal. Anan nase'e gawa afa' wanda' opeha Anan ma amamaga amama. Ea' dei' nasapa' ensel ananinai nafi'mai ae' Jon. Ae' dei' anda'mana maol Godi, ea' Anan nase'e basef amama ae' wapoti'. ² Ae' atolom ea' amamaga amama awalapam a'iam alihim basef Godi maloma basef amama endilisi Jisas Kraiss nanda'ami mandawalap alihim.

³ Emi egafis setalifa basef amama Godi mail buk anama ma malogof اساسيمي ma amamaga anona nemaf migi' meatagai, esis God nondas sondanifel. Ea' emi egafis some' basef amama ma ukup اساسيمي, esis sondanifel wapoti'. Dei' main, nemafa amamaga amama migi' meatagai felefele'ma motaga.

⁴⁻⁶ Ae' Jon anda' basef amama ma ipe' Kristen pape wambel 7-peleimi etap hiagoma Asia. God fowa' gani nape, dei' nape, anona nemaf owagama nope la'ela'ef hihif. Anan naloma Jisas Kraiss maloma ambagof bu'wami 7-peleim mape felefele'ma balata bu'unai Godi. Ae' a'i amam migiambamepa na'a monda'epa petaga la'ifipa mose'epa opalef awanem. Jisas Kraiss Anan naila basef ananinai nanda' maol ananinai andeande'. Ea' nawalapa basef hiami Godi andeande'. God nali' nafelona nohafel hi'agif. Ea' nape nali'ma anona nemaf esis saga'i God nofelas sohafel wapoti'. Jisas Kraiss Anan atona dembinai numafi amam king Dembemi mape etap.

Anan atona okom lu'unai nainaila ape' hiapai, ma esimbel ananinai atom natagahepa ma waf aonai ape' manda'anai mataga wafifipa. Anan atona nanda'apa dei' mape dembipai malomana mumafi epes hiesi si'i amam king. Ea' nanda'apa mape pris si'i mondolalima God manda' opeha God Ahalomana ananinai. Ae' a'i nafifili noloma pepel hianai Ananinai atona nope la'ela'ef hihif. Endilisi.

⁷ ^a Piti, Anan la'ifinai anona nemaf nifi'i noloma otaga esis hiesi sotolona naep اساسيمي ea' epes isima fowa' sahana wamba'wi sotolona wapoti'. Amama atom esis amam nematawa hiesi sape etapi sotolona sogawa solopana kwapete'as ma waf aonai esis sanda'anai. Amama anona nemaf motaga na'ama. Endilisi.

⁸ ^b Dembinai God pepel hiamunai Anan na'iam na'ama na'i, "Ae' atowe ape Dembiwei la'ela'ef hihif ape ali'i, ape agi'i endilisi."

Ea' Ae' atowe fowa' gani ape, dei' ape, anona nemaf owagama etanima ifi'i.

Jon nati Kraisi, God nandandepana nasapa'ana nafi'i

^{9c}Ae' Jon sahalomepa ipe'iwei. Ae' alomepa, ape' hiapai Jisasi atepa mape la'ifipa malomana. Ae' alomepa mandao'oma mofa' nimanimi ma muwis wambota Godi numafiapa. Ape' mape la'ifipa maloma Jisas ea' ape alomepa mandao'oma ape' hiapai mape so'umbel mape maitu la'ifipa na'ama etina mofa' nimanimi. Ae' awalapa basef Godi maloma basef endilisimi ma opeh Jisas nanda'ami. Amama atom dei' esis sandaiwa'me sagalo'me afi'i ape ailan agiliguma sa'i Patmos.^d

¹⁰Anona nemaf Dembinai Sande Ambal Bu'unai Godi numafi ae' ame' anona maf na'i mehup nandame' si'i safapula alof, na'i nataga alafuga ae'anai.

¹¹Ea' na'ipi na'i, "Ine' da'a basefa amamaga amama nambimb neatulumil buk. Ea' nenda' basef amama mil buk anama mefe' amam nematawa Godi sios 7-peleim sape wambel anama 7-peleina atona etin. Wambel anama agofuguma amama. Efesus, Smerna, Pergamum, Taiataira, Sardis, Filadelfia, Laodisia."

¹²Ea' ae' andamboma a'i iti anama na'ipa ae'i. Ea' ati lamifah 7-peleim matoma gol 7-peleim. ^{13e}La'afena gol amama ati anona aman nalomam naitu. Anan nandati si'i anona dembinai nataga epen endilisinai. Nala luwaguf laumi mowala mambaho'wa bo'wagah ananimi ea' nowaho' let sanda' gol sanda'anai mafata ananinai. ¹⁴Balaga naloma auf malonai afitim endilisi si'i auf malo sipsipi o si'i elagw amama afitimi. Naep ananimi fandom si'i nif ilelowa. ¹⁵Ea' bo'wagah ananimi manda' gambigambis endilisi mandati si'i bras kapa batafunai saofam nif lu'wami. Ea' ame' malogel ananinai nanda'am si'i embel mawis mehup kululu' etin. ^{16g}Anan nahapila ondowa 7-peleim nahapilam lagel da'isinai ananinai. Ea' anona bainat hi'alina wa'owa'ili nawisi nape malogel ananinai. Amaga ananinai nafifil endilisi si'i owaf naluwi la'ifina.

¹⁷Ae' atolona ea' ewa a'oh felefele'ma bo'wagah ananimi andati si'i aga'i. Ea' anan nasa lagel da'isinai ananinai ma ae' na'ipi na'i, "Ine' umbamehena owa'. Ae' ape dembiwei la'ela'ef ape ali'i ape agi'i endilisi. ^{18h}Fowa' aga', ea' dei' ape namowe la'ela'ef hihif. Ae' ape Dembiwei ali' ape agi' ma amamaga hiami maloma epes. Ea' ahapila ki ma wambel saga'i sapoma. ¹⁹ⁱEa' ae' al' ine' nenda' basefa amamaga amama dei' ine' natulumil, nenda' basefa amamaga amama dei' mapani maloma amamaga anona nemaf migi' meatagai wapoti' nenda'am mil buk. ^{20j}Ine' nati ondowa awama 7-peleim wape lagel da'isinai ae'anai waloma lamifah

c 1:9 Re 6:9 **d** Jon nape ailan Patmos si'i sanda' kalabusimana nape. **e 1:13** Dan 7:13; 10:5 **f 1:14** Dan 7:9; 10:6 **g 1:16** Hi 4:12; Re 1:20; Re 2:12,16; Re 19:15,21 **h 1:18** Ais 44:6; 48:12; Re 2:8; 22:13 **i 1:19** Re 1:1 **j 1:20** Re 1:16; 2:1; Re 3:1

amama 7-peleim matoma gol amama 7-peleim. Amama mondola'wifi atom. Basef ofagema amama. Ondowa mondola'wifa ensel mumafi sios amam nematawa hiesi Godi 7-peleim, ea' gol amama mondola'wifa sios amam nematawa Godi amama 7-peleim.

Basef mafe'ma esis Kristen sape Efesusi

2 ^{1k}Ine' da'a anom basef mofe'ma ensel anama numafi sios amam nematawa Kristen sape Efesusi. Ae'^l aman ahapila ondowa amama 7-peleim lagel ae'anai da'isinai afe' la'afena gol amama lamifah matomami 7-peleim. Ae' anda'mepago basef amama ipe'.

^{2m}Ae' egawa amamaga maim ipe' panda'ami opeh lu'wami. Nimanimi matagamepa, paitu la'ifipa la'ela'ef, ina patanima, owa'. Ea' ae' egawa ipe' paitu la'ifipa endilisi ma pandaiwa'ma amama manda' waf aonai. Ipe' pawaloga amam amama mambaso'ami ma'i amam aposel, patolom pegawa amam ina aposel, owa'. Amam mambaso'ami. ³Ipe' paitu la'ifipa la'ela'ef ma epes isima sandaiwa'ma agel ae'anai ma sanda'mepa waf aonai, ina patanima, owa'. Ae' egawa ipe' panda' opeh ae'ami lu'wami la'ifipa ea' ina umbamahepa pakwahom, owa'etin. Ipe' paitu la'ifipa pefa' nimanimi amama. ⁴Ea' dei' anom basef awami mapomepa. Fowa' dambadamba ukup ipe'imi maimaila Ae' pembale'efa Ae' andeande', ea' dei' owa'etin. ⁵ⁿDei' ukup mi'i' waf anama bu'unai fowa' pali' panda'anai. Ea' pemboma opalef pilana penda'ana pigi'mana wapoti' si'i fowa' dambadamba panda'ana. I'i ipe' owa' pemboma opalef, anona nemaf ae' ifi'i etagamepa ili'amona gol amama ipe'imi lam natamonomi. ^{6o}Ea' dei' anona waf bu'unai ata' napaipa. Enis epes hiesi agel sa'i Nikolas Ae' andaiwa' endilisi ma waf esis sanda'anai, ea' ipe' wapoti' pewa' alafugahas pandaiwa' endilisi ma waf esis sanda'anai.

^{7p}Ipe' emi egafipa aligah mapaipei peme' andeande' basef amama Ambal Bu'unai Godi nawalapama sios esis amam nematawa Godi!

Emi egafis situ la'ifis sili'amona wandafa waf aonai, anona nemaf Ae' i'i aho'ma esis sea' su'utip lawag anama epes se'am sofa' ambagof namumi. Lawag anama notawa aof Godi agiliguma Paradais.

Basef mafe'ma esis Kristen sape Smernai

^{8q}Ine' da'a anom basef mofe'ma ensel numafi sios esis amam nematawa Godi sape Smernai. Ae'^r ape Dembiwei la'ela'ef hihif ape ali', ape agi' endilisi. Fowa' aga', dei' ehafel wapoti' ape namowe ambal napaiwe. Dei' anda'mepago basef

k 2:1 Re 1:16,20 **l** Basef amama ma'i Jisas Kraiss atona. **m 2:2** Re 2:19; Re 3:1,8,15; 1 Jo 4:1 **n 2:5** Re 2:16,22; Re 3:3,19 **o 2:6** Sam 139:21 **p 2:7** Jen 2:9; Re 22:2,14,19 **q 2:8** Re 1:17 **r** Niti futnot Kamapim Tok Hait 2:1.

amama ipe' a'i, ⁹Ae' egawa nimanimi amama matagamipei ea' Ae' egawa ipe' pape kwahupei otamba hiahaom maim a'epa. Owa'etin. Ipe' amamaga hiami ma'omepa gani ilif heven. Ae' egawa basef amama awami enis epes sa'iana ipe'. Amam nematawa isima sambaso'mepa sa'i, 'Afa' Juda.' Ea' esis ina saila waf Judai, owa'. Esis sambaso'mepa. Esis wambota Satani etis. Ae' egawa amamaga amama. ¹⁰Ipe' ina umbamehepama nambimb pefa' nimanimi, owa'. Ipe' peme'! Nambimb Satan nonda' enipa penda' kalabusa nogwamba ipe' pefa' nimanimi amama nimeguf 10-peleim. Ea' kwawie', ipe' pembale'efa Ae' pitu la'ifipa ma enis si'i sehepa pega', pitu la'ifipa pembale'efa Ae'. Ama Ae' anona nemaf ease'epa ambal namunai ipe' si'i amamaga bu'wami esis sasagih sikila' sefa'ami. ¹¹Ipe' emi egafipa aligah mapaipei, peme' andeande' basef amama Ambal Bu'unai Godi nawalapama esis amam nematawa Kristen. Emi egafis situ la'ifisa sili'amonan wandafa waf aonai, anona nemaf ga' anama neafe'ma bifi ina nohambombagas nonda'as sefe' wambel aonai, owa'.

Basef mafe'ma esis Kristen sape Pergamumi

¹²Ine' da'a anom basef mofe'ma ensel anama numafi sios amam nematawa Kristen sape Pergamumi. Ae' ahapila bainat launai hi'alina wa'owa'ili. Ea' anda'mepago basef amama ipe' a'i, ¹³Ae' egawa wambel ipe'inai. Satan atona ata' nape dembinai ma wambel anama. Ea' ipe' pahapila agel ae'anai la'ifipei pembale'efa Ae'. Ipe' ina pakwaha pembale'efa Ae', owa'. Fowa' aman anama Antipas anan nawalapa basef Ae'ami andeande'. Ea' sahana naga' wambel ipe'inai Satan napoma. Ea' nogota anama ipe' ina pakwaha pembale'efa Ae', owa'.

¹⁴Ea' Ae' a'i i'ipipa anom basefa waf aonai ipe' panda'anai dei' ata' napomepa. Enis amam nematawa sape salomepa Pergamum, esis ata' saila waf anama si'i anona aman Balam fowa' nanda'anai la'ifis. Waf aman anama na'ama. Fowa' gani anan nihi'amba anona aman Balak nambaso'mana nanda' esis amam nematawa Israelisi sowa sanda' waf aonai. Ea' Balak nafela ukup esis Israeli ma sagwa' mafis maloma gwa'aimi amama saso' god baso'omunai sanda' waf aonai so'a waolanai. ¹⁵Ea' na'ama etin enis amam nematawa saloma ipe' esis ata' saila waf anama aonai enis epes hiesi sa'i agel Nikolas sanda'anai. ¹⁶Ipe' pemboma opalef pekwaha waf aonai ipe' panda'anai. I'i owa', Ae' felefele' a'i etagamepa epa' eloma epes isima owa' somboma opalef sifi'mai ae'i ehas bainat nape malogel ae'anai. ¹⁷Ipe' aligah mapaipei peme' andeande' basef amama Ambal Bu'unai Godi nawalapama esis amam nematawa Kristen. Emi egafis situ la'ifisa sili'amonan wandafa waf aonai, Ae' anona nemaf ese'asa gwa'aimi Ae'ami bu'wami mandambaho' mape heveni. Gwa'aimi amama agilima mana. Ea' ese'asa anom otamba bu'wami

afitimi atona etin, ea' enda' anona agel namunai nil otamba amama. Ina enin epen negawa agel anama, owa'etin. Epen nefa' otam anama, enin etin negawana.

Basef mafe'ma esis Kristen sape Taiatairai

¹⁸Ine' da'a anom basef mofe'ma ensel anama numafi sios amam nematawa Kristen sape Taiatairai. Ae' nogalomana Godi, naep ae'ami howalagon endilisi si'i nif fandom la'ifim endilisi, bo'wagah ae'ami howalam gambigambis endilisi si'i bras howalagon. ¹⁹Ae' egawa ma waf hianai bu'unai ipe' panda'anai. Ae' egawa ipe' ukup maimaila God naloma epes wapoti' pembale'efa Ae' panda' opeh hiami pagiambama epes hiesi. Ae' egawepa paitu la'ifipa ma nimanimi matagamipei. Ae' egawa maol anama bu'unai ipe' fowa' panda'anai. Ipe' dei' panda' maol anama bu'unai hianai pikila' fowa' panda'anai. ²⁰Ea' Ae' anom basefa waf aonai ipe' panda'anai. Ipe' pati nemata'w akwama Jesebel kwape kwalomepa. Akwa'w kwa'i, 'Ae' profet a'i basef Godi mandambahi'i.' Owa', kwambaso'mepa kwawalipa ipe' panda' maola ae'i panda' waf so'a waolanai aonai ma pa' gwa'aimi amama sondolali saso' god baso'omunai. ²¹Ae' a'i akwa'w komboma opaf, amama atom dei' Ae' ata' animbalow kwape anom nimeguf, owa'etin. Akwa'w ina kwa'i komboma opaf kowa' alafugama waf anama aonai so'a waolanai, owa'. ²²Ea' dei' peme! Nambimb ikwaho'w kowai balata ese'akwa nimanimi lu'wami moloma bumbilita lu'unai. Ea' esis amam nematawa saila waf aonai akwa'unai wapoti' sofa' nimanimi amama. I'i esis owa' somboma opalefa sowa' alafugaha waf anama sanda'anai, ese'as nimanimi amama lu'wami. ²³Esis isima saila basef akwa'umi wapoti', nambimb ehas sog'a. Ama esis amam nematawa hiesi Godi sogawa Ae' awaloga nomonas maloma ukup epes hiesi andeande'. Ea' anona nemaf egwamepa amamaga ipe' atona etin, mondahama waf ipe' panda'anai.

²⁴Dei' ae' a'i i'lipipa anom basef ipe' enipa amam nematawa pape wambel Taiatairai, ipe' owa' pila basef amama awami akwa'umi, owa' pila waf anama sofalana sa'i, 'Basef mandambahi'i ma waf Satani,' owa'. Ae' a'lipipa na'ama. Ae' ina nambimb ese'epa anom nimanimi wapoti' ma ipe', owa'. ²⁵Waf hianai bu'unai ipe' pagi'manai, anama ipe' pembale'ef la'ifipa pefe' ma petaga nogota Ae' iefi'ianai. ²⁶⁻²⁷u v Ipe' emi egafipa pitu la'ifipama wandafa pili'amona waf aonai ma pila okom Ae'anai pefe' petaga nogota hi'ilana, Ae' anona nemaf ese'epa pepel ipe'. Ama pepe dembipei ma amam nematawa hiesi. Na'ama etin si'i fowa' Ahalome nase'e pepel ma ape Dembiwei imafi epes hiesi. Ipe' wapoti'

s 2:23 Sam 7:9; Jer 17:20; 2 Ti 4:14; Re 20:12,13 t 2:25 Re 3:11 u 2:26 Sam 2:8,9 v 2:27 Re 12:5

pepe dembipei pefa' pepel pimafi enis amam nematawa wapoti' na'ama. Ipe' pimafias la'ifipa si'i anona aman nahapila kalamuta sanda' ain sanda'anai, si'i anona aman nawala malep papalalana. ²⁸ wEa' ese'epa ondo'w kuhumbitai'wi lala'wan. ²⁹ Ipe' emi egafipa aligah mapaipei peme' andeande' basef amama Ambal Bu'unai Godi nawalapama esis amam nematawa Kristen.

Basef mafe'ma esis Kristen sape Sardisi

3 ¹ Ine' da'a anom basef mofe'ma ensel anama numafi sios amam nematawa Kristen sape Sardisi. Ae'^y ahapila anom ambagof bu'wami Godi 7-peleim ea' ahapila ondowa amama 7-peleim.

Ae' egawa waf hianai ipe' panda'anai. Esis sa'i basefa ipe' na'ama sa'i, 'Ipe' ambal napaipa.' Owa'etin. Ipe' si'i saga'i. ² Ipe' hafel pekwaha pa'oh pandondo'ah! Waf hianai aonai ipe' panda'anai ata' napaipa la'ela'ef na'i nehapa pega'. Ea' anona waf bu'unai kwaie'una ipe' penda'ana notaga la'ifina nape. Dei' main? Waf hianai ipe' panda'anai, Ae' ina ati anona ata' bo'ona ma naep Ahalome Godi, owa'. ³ Ipe' ukup mopoma basef amama Ae'ami fowa' pali' pame'am pefa'am ea'i. Pigi'mam pemboma opalef pekwaha waf aonai pifi'mai Ae'. I'i ipe' owa' pehafel ulal pekwaha koh, nambimb Ae' ifi'i endambaho' etagamepa si'i epen nanda' wali nafi'i nataga ea' ina pegawa maina nogota ae' eatagamepa, owa'. ⁴ Ea' ipe' enipa pape Sardisi owa' penda' luwaguf maim ipe'imi aom, anona nemaf pindawisa luwaguf afitimi dambaimi atom pefe' peloma Ae'. Dei' main, ati ipe' epes bu'upe'i ma pefa'am amama. ⁵ Ipe' paloma enis epes wapoti' sape ambal namunai la'ela'ef agof ipe'imi mail anona buk sa'i buk ambal namunai napainai. Emi egafis situ la'ifisa sili'amona wandafa waf aonai, Ae' ese'as luwaguf amama afitimi solam. Ea' ina anona nemaf egagaha agof asasimi mail buk anama, owa'etin. Mil la'ela'ef. Ewalapa agof asasimi ma naep Ahalome ae'anai noloma amam ensel Ananimi i'ipam i'i epes isima ae'asi. ⁶ Ipe' emi egafipa aligah mapaipei peme' andeande' basef amama Ambal Bu'unai Godi nawalapama esis amam nematawa Kristen.

Basef mafe'ma esis Kristen sape Filadelfiai

⁷ Ine' da'a anom basef mofe'ma ensel anama numafi sios amam nematawa Kristen sape Filadelfiai. Ae'^d bu'uwei endilisi dei' ahapila ki ma uta anama fowa' king Devit nahapilanai. I'i Ae' ewisi'ana, anona aman ina la'ifina ma nowalowana,

w 2:28 Re 22:16 x 3:1 Re 1:4,16; 2:2 y Niti futnot Kamapim Tok Hait 2:1. z 3:3 Re 2:5; 1 Te 5:2 a 3:4 Ju 23 b 3:5 Mt 10:32; Lu 10:20; Re 3:18 c 3:7 Ais 22:22 d Niti futnot Kamapim Tok Hait 2:1.

ea' Ae' i'i ewalowana wapoti', nambimb enin epen ina la'ifina niwisi'ana, owa'. Ae' atowe a'ipipago basef amama ipe'. ⁸eAe' egawa waf hianai dei' panda'anai hi'alana ea' egawa ipe' wapoti', ata' la'ifipa kwaikwaie' ma enis epes owa' some' basef ipe'imi. Ea' ipe' paila basef ae'ami andeande'. Ea' ina pambaho' agel ae'anai, owa'.

Ipe' piti, ae' anda' uta nagal napomepa, owa' anona aman la'ifinama nowalowana, owa'. ⁹fIpe' peme'! Ipe' pegawa epes isima Satani. Esis sa'i basef sa'i esis epes Judai, owa'etin. Esis ina saila waf Judai, owa'. Esis sambaso'ami. Ae' anona nemaf enda' epes isima sifi'i sindiwa nembawa sotawa felefele'ma bo'wagah ipe'imi ma sogawa ae' okom nainailipa. ¹⁰gIpe' paila basef ae'ami andeande' paitu la'ifipa ma nimanimi amama matagamipei. Ea' Ae' dei' imafi ipe' ma nemaf anama amama meagwambipei motagama amam nematawa hiesi etap hiagomai ma God nowalogas waf bu'unai aonai. Amama ina anona nemaf motagama ipe', owa'. ¹¹hAe' ifi'i etagama ipe' mehip. Waf bu'unai ipe' pailanai dei', pilona la'ifapa la'ela'ef. Na'ama anona aman nondalombepa amamaga bu'wami mapoma ipe' ma anona nemaf pefa'ami. ¹²iEmi egafis situ la'ifisa sili'amona wandafa waf aonai, anona nemaf Ae' enda'as situ la'ifis si'i olaf nombalo' ipat lu'unai Godi Ae'anai. Ea' epes isima ina sokwaha ipat anama lu'unai sotanima suwisi ande' wapoti', owa'. Sope andeande' nomon la'ela'ef. Anona nemaf enda' agel Ahalome Godi nila esis noloma agel wambel anama lu'unai God Ae'anai Jerusalem, wambel namunai bu'unai. Wambel anama anona nemaf nokwaha heven God Ae'anai napoma nisila'i. Ea' agel namunai Ae'anai wapoti' enda'ana nila esis. ¹³Ipe' emi egafipa aligah mapaipei peme' andeande' basef amama Ambal Bu'unai Godi nawalapama esis amam nematawa Kristen.

Basef mafe'ma esis Kristen sape Laodisiai

¹⁴JIne' da'a anom basef mofe'ma ensel anama numafi sios amam nematawa Kristen sape Laodisiai.

Ae'^k

ofagewe ma basef endilisimi awalapam mafe' andeande' basef hiami Godi. La'ela'ef awalapam andeande'. Ae' Dembiwei ma amamaga hiami God nanda'am mape ilif etapi maloma epes hiesi wapoti'. Ae' a'ipipago basef amama ipe'.

¹⁵Ae' egawa waf hianai dei' ipe' panda'anai. Ea' egawa ipe' ina pohalepa, owa'. Ea' ipe' ina nifipa, owa'. Ae' a'i ipe' pepe pohalepa o pepe nifipa. ¹⁶Owa'etin. Ipe' nifipa kwaukwawie'. Ipe' owa' nifipa endilisi

e 3:8 1 Ko 16:9; Re 2:2 f 3:9 Re 2:9; Ais 45:14; Ais 49:23; Ais 60:14 g 3:10 Lu 21:19; 2 Ti 2:12 h 3:11 Re 2:10,16 i 3:12 Ais 62:2; 65:15; Esi 48:35; Re 14:1; 21:2 j 3:14 Re 1:5; 19:11; Kl 1:15 k 3:14 Niti futnot Kamapim Tok Hait 2:1. l 3:15 Ro 12:11; Re 2:2

ea' owa' poholepa endilisi. Ea' Ae' andaiwa'mepa a'i igu'upei malogel ae'anai. ¹⁷Ipe' pa'iam na'ama pa'i, 'Ape' moni hianai naloma amamaga hiami ma'omapa. Ape' ina anom amamaga a'apa, owa!'

Ea' naep Ae'ami atilipa pape awepa endilisi ma enis epes sati owahipipa. Ipe' pape kwahupa endilisi naep mase'epa alop nape na'a. Ipe' owa' pegawa amama mowalapa waf aonai ipe' panda'anai, owa!. ¹⁸Ea' ese'epa gawa ma ipe'. Gol Ae'ami dei' fandom mataga bo'om endilisi. Andeande'ma ipe' petalom petaga bu'upei amamaga hiami endilisi. Andeande'ma petala luwaguf afitimi pelam muli'akwa alop ipe'inai ma esis ina siti alop ipe'inai nope wafifina ea' ambagof aom, owa!. Andeande'ma ipe' petala anona marasin penda'ana naep ipe'imi ma piti andeande'. ¹⁹Epes hiesi emi egafis Ae' okom nainailas, isima Ae' enda' megah mohas ehas bolam ma enda' waf asasinai notaga bo'ona. Ea' ipe' wapoti' ukup mopoma waf ipe'inai hianai, pemboma opalef pekwa waf aonai pifi'mai Ae'. ²⁰Ipe' peme', Ae' aha uta aitu. Emi egafis seme' malogel Ae'anai ma susi' uta, Ae' iwis nomon epe elomas ope atogon wea' gwa'aيمي. ²¹Emi egafis situ la'ifisa sili'amona wandafa waf aonai, Ae' anona nemaf i'i aho'ma esis sope solome ma sope dembesi balata king Ae'anai. Na'ama etin si'i fowa' Ae' aitu la'ifiwi ali'amona wandafa waf aonai. Ea' dei' ape aloma Ahalome Ae'anai ape balata king Ananinai. ²²Ipe' emi egafipa aligah peme' basef amama andeande' Ambal Bu'unai Godi nawalapama esis amam nematawa Kristen.”

Esis sanda' lotuma God gani heven

4 ¹Amama mataga ea', ati gani heven anona uta nandawisi' nape. Ea' maf anama fowa' ae' ame'anai na'i basef amama si'i anona alof nalef ea' na'i, “Ine' lotowi na'ae ilif ihi'ambena amamaga anona nemaf migi' meatagai.”

²Ea' mehip Ambal Bu'unai Godi nataga la'ifina ma ae'. Ati gani heven balata kingi ati anona aman Dembinai natoma balata anama nape.

³Anan howalagon la'ifina si'i otam bu'unai agilina ma jasper naloma otam akwahinai agilina ma konilian. Ea' anona elelina natoma balata anama king natomanai ea' ati elelina anama goloto'unai si'i anona otam bu'unai agilinama emeral. ⁴Anom siafah hiami bu'wami 24-peleim motawa tulif etina balata anama dembinai kingi. Ea' anom agufumi mala luwaguf afitimi atom matoma mandandamam siafah amama 24-peleim. Mowalo' hagw dembemi atom mowalo'ami balagah amamumi sanda' gol sanda'ami. ⁵Otaga holala natagai balata kingi diwala. Ea' anom amalemb lu'wami mala' wapoti' balata anama nape natologoma bagah 7-peleim fandumi mape mafifimana. Bagah amama Ambagof bu'wami Godi

7-peleim. ⁶Ea' anama balata kingi notawa natologoma anom amamaga mape. Amama si'i embel naoh lu'wami. Amama mandati si'i mapelaga mati embel mati ambagof.

Ea' anom amamaga biamibiam ambal namunai napaimi mape la'afen anama balata kingi maitu. Amam mape naep hiami mapaim hi'alam maso'ala amagah opalef amamumi alafugah hi'alam. ⁷Nali'i ambal napainai si'i anona mafin lu'unai wandafunai laion. Nagi'i anan si'i bulmakau suwafunai. Nafe'ma wanomi anan amaga nandati si'i amaga epeni. Ea' nafe'ma biamibiami nandati si'i anona komon lu'unai nufia' nafe' ilifi. ⁸Ambagof namumi mapaimi bihinagof wanom wanom mape mandandam. Ea' alop amamunai si'ina naep atomana hi'alana. Ea' owamb alip amam ma'i la'ela'ef na'ama ma'i, “Dembinau God Anan la'ifina bo'ona endilisi! Fowa' gani Anan nape dei' nape, anona nemaf owagama wapoti' nope la'ela'ef.”

Amam ina mapoma noma'wa ma'i basef amama, owa'. Manda'am la'ela'ef. ⁹Amam mandanifela God natoma balata kingi nape ambal namunai la'ela'ef. Ea' mafela agel Ananinai manifelona. ¹⁰Ama nimeguf hiami maina nogota amam manda'am na'ama, agufumi amama 24-peleim mindiwa nembawa ma naep Dembinai kingi, natoma balata kingi. Ea' amam manda' lotuma Anan nape la'ela'ef. Amam mowali hagw amamumi golim makwahom mondola'wifa mape owina Anan Dembinai amamunai. Hagw amama mafe' mowa felefele'ma balata kingi notawa natologoma ea' ma'i,

¹¹ “Ine' God afa'inai Dembinai afa'inai. Ine' la'ifinai bu'unai endilisi ma epes hiesi sondanifela ine' sofela agel ine'inai lu'una. Ine' la'ifinai. Dei' main, ine' nanda' amamaga hiami. Okom ine'inai atona na'iam nanda'am mataga. Ea' dei' amamaga amama hiami mape ambal napaim.”

Jon nati anona buk sakolasona na'oh

5 ¹Ea' ati aman anama natoma balata kingi nahapila anona buk lagel da'isinai ananinai. Buk anama amef mail nomon ande'. Ea' sanda' tep si'i blasta sowa' buk anama. Tep tu'wanina 7-peleina sowa'ana buk anama. ²Ea' ati anona ensel la'ifinai noga na'i mehipe na'ama na'i, “Emi epen bu'wani ma atuwasi la'ifina nehape' tep anama nowa' buk anama?”

³Owa' anin epen atitin nape heveni o nape etap anae'i o nape etap owini la'ifina nehape' tep anama nowa' buk anama nati nomonana, owa'. ⁴Ae' ati esis ina sati anin epen la'ifina nefa' buk anama niti nomonana, owa'. Ea' ae' dei' okom nimanina amama alef ega a'i mehipe. ⁵Ea' anan agilinai na'ipi na'ama na'i, “Ine' owa' nelef! Neme! Anona aman natagama wambota anama launai esis Judai, aman anama ma'una Dembinai nataga wambota anama bafalomewa Deviti. Anan si'i anona mafin wandafunai laion, nikila'

wandafa waf aonai. Amama atom dei' atuwasi Anan la'ifina ma nehape' tep anama 7-peleina nowa' buk anama naufeniana.”

Jon nati sipsip noganai

⁶Ae' ati amama biamibiam ambal napaimi maloma amam agufumi mape malipa anona mafin sipsip noganai. Anan naitu, nandati si'i sahana afuna. Anan naitu felefele'ma balata anama kingi. Wambawa mataga balagana 7-peleim ea' naep 7-peleim. Naep amama ma'i Ambagof Bu'wami Godi 7-peleim nasapa'am mafe'agon hi'alagon etap anae' hiagoma. ⁷Sipsip anama noganai nafe' nofa'ai buk anama nape lagel da'isinai Ananinai natoma balata anama kingi. ⁸Nofa' buk anama ea', amamaga amama biamibiam ambal namunai napaimi maloma agufumi amama 24-peleim mindiwa nembawa motawa felefele'ma sipsip anama noganai. Agufumi amama hiami atona etin mahapila anona musik si'i gitai naloma anom dis gol si'inama sanda amama nogoh alogw bu'wami ma'ami. Sanda amama alogw ambul mataga malata ilif si'i beten esis amam nematawa Godi. ⁹Ea' manda' anona awaf dambainai na'ama ma'i, “Ine' bu'winai endilisi ma nefa'ai buk anama nahape' mandof tep anama hianai mowa'anai. Dei' main, esis sahena naga', esimbel ine'imi matala epes isima wapoti' sotanmani nase'anas God. Ine' natala esis amam nematawa hiesi hi'alasa epes hiesi wambotagw hiami mamumami, diga naninani hianai, alop naninani hianai ma epes sape etap hiagoma wambel hiagoma ma sotanmani. ¹⁰Ine' nanda' epes isima hiesi sataga si'i pris mondolalima Godi ma Anan nope Dembinai ma esis numafias sonda' maol Ananinai. Ea' esis anona nemaf sope si'i king sumafi epes hiesi sape etapi.”

Esis safela agola sipsip noganai

¹¹Ae' atologon ame' malogof ensel hiami endilisi siambam namba amamunai hiami handet milian tausen, hiami endilisi. Amam maitu malipa balata anama kingi maloma amamaga amama ambal napaimi maloma amam agufumi. ¹²Amam ma'i ma'oh mehup ma'i, “Anama ma'una sipsip noganai, fowa' esis sahana naga'i. Anan bu'unai endilisi ma nofa' namba agel lu'unai noloma amamaga hiami bu'wami otamba hiahaom maim moloma pepel lu'unai noloma gawa bu'unai noloma howalagon. Anan bu'unai endilisi ma epes hiesi sefela agel Ananinai sondanifela Anan sinifelona.” ¹³Amama mafe'ma ea', Ae' ame' diga ma amamaga hiami maloma epes hiesi God nanda'as ambagof mapaisi hi'alas. Hiesi sape heveni sape etap anae' saloma sape etap owini saloma sape naoh embel owini. Ame' amamaga amama hiami maloma epes isima hiesi sape anama hiagomai sanda' anona awaf na'ama sa'i,

“Dembinaï nape balata anama Kingi naloma sipsip noganai wapoti', amam biam bu'wami ma mofa' danifel anama hianai naloma agel lu'unai naloma pepel naloma howalagon. Amam biam bu'wami ma mofa' amama nimeguf hiami la'ela'ef hihif.”

¹⁴Ea' amamaga amama biamibiam mape namumi ma'i, “Endilisi!”

Ea' agufumi amama 24-peleim mindiwa nembawa manda' lotuma God naloma sipsip noganai.

Sipsip noganai nahape' tep 7-peleina buk anama

6 ¹Ae' ati sipsip noganai nahapila buk anama tep 7-peleina nowa'ana nahape' tep nali'i. Ea' ame' anona ma amam amama biamibiami na'i basef diga ananinai ame' si'i otaga diluluwagala. Anan na'i, “Ine' fi'i!”

²Atologon wapoti', ati anona mafin hos afitinai epen natomanai nahapila kopa'w. Esis sase'ana anona hat si'i sanda' wandaf sali'amonana sofa'ami. Ea' anan la'ifina nafe' dei' nali'amona wandaf okom la'ifina nape la'ela'ef na'i nonda' wandaf lu'unai nikila' epes hiesi.

³Sipsip noganai nahape' anona tep nafe'ma bifi nowa' buk anama ea' ame' anona ma amama biamibiam nafe'ma bifi na'i, “Ine' fi'i!”

⁴Ea' anona hos akwahinai howalagon endilisi nataga, anona aman natoma hos anama. Amam amama biamibiam mase'ana pepel aman anama natoma hosi. Ea' la'ifina ma nili'amona nogota bu'unai ma amam nematawa etap anae'isi. Ea' esis lupulupa' so'oh sogal. Ea' mase'ana anona bainat lu'unai ma nonda' wandaf.

⁵Ea' sipsip noganai nahape' anona tep nafe'ma wenifi wapoti' nowa' buk. Ame' anona ma amama biamibiam nafe'ma wenifi na'i, “Ine' fi'i!”

Ae' atologon wapoti' ati anona hos alialinai. Aman natomanai nahapila anona skel si'i ikwaf dende'ma nowaloga gwa'aimi nihi'ambasa ikwaf dende'. ⁶Ea' ame' anona maf si'i anona malogel na'i la'afena amam biamibiam na'i, “Ine' nesaho' anona malep sala su'utip witimi ma 3 kina. Ea' nesaho' maloh sa'umi wanom bali si'i wit napaimi ma otamba 3 kina. Ine' owa' nehambombaga wain noloma wel hi'ilam, owa'!”

⁷Ea' sipsip noganai nahape' tep nafe'ma bifibifi nowa' buk, ea' ame' malogel anona ma amam ambagof mapaimi nafe'ma biamibiami na'i, “Ine' fi'i!”

⁸Atologon wapoti' ati anona hos batafunai, aman natomanai agel ananinai ga'. Ea' anona aman numafi wambel esis saga'i sapoma nag'i'mana nafi'i. Amam biam mowala amam nematawa hiesi sape etapi sotaga wambotagw biamibiam ea' amam motaga la'ifima moha enis amam nematawa hiesi sape anona wambota atotona sogal. Ea' amam biam moha enis sogal bainat amamunai ea' enis nolomohas sogal ea' enis awes naninani nonda'as sogal ea' mafis amama wandafumi mape aolupi moha enis sogal.

⁹Sipsip noganai nahape' tep anama wapoti' nafe'ma wenif bifi nowa' buk, ati ambagof enis epes saga'i sape owina balata sondolalima Godi. Fowa' epes isima sombale'efa basef Godi la'ifis sawalapam sa'iam sa'ipasama Jisas Kraiss nagiangamas. Ea' isima sandaiwa'ma Godi sahas saga'. ¹⁰Ea' ambagof amama ma'i mehip na'ama ma'i,

“King dembinai nahapila ilif etap, ine' nape bo'wena, ine' endilisinai! Afagof ma'um mefe' hi'ilam muli' ma ine' nenda' kotima esis amam nematawa sape etapi, ma negwa esimbel ape'imi?”

¹¹Ea' God nase'ama anom luwaguf afitimi laumi atona etin na'ipam na'ama na'i, “Ipe' ata' pepoma noma'w nogota bandana. Anona nemaf esis naumbih soha sahin owan isima ipe' pandao'oma panda' maol atonai sog'a, si'i sahepa paga'. Anona nemaf dohandohama esis naumbih sohas sog'a sotaga ma ikwaf ae' a'ianai, egwa esimbel ipe'imi.”

¹²Ae' ati sipsip noganai nahape' tep anama nafe'ma wenif wenifi nowa' buk dei' atef sowambon lu'unai nakoto'ma etap, aon alipunai nataga nandamboma alialina si'i lowaf alinai apinai. Ea' aon owambunai nataga akwahina hi'alana si'i esimbel. ¹³Ea' ondowa mape ilifi mowai etap si'i su'utip mail lawah figi owa' ata' akume uf nakoto'mam mowai. ¹⁴Ilif wapoti' nafe' hi'alagon si'i samagwia mat sowa'ana. Ea' halafutagw hiami maloma ailan hianai makwaha anama mapoma mindiki'ah mafe' anagon. ¹⁵Ea' amam king dembemi etapami maloma agufumi maloma amam kepten dembemi mumafi amam soldia maloma amam amamaga hiamumi maloma amam amama aguf lu'wamumi maloma epes isima hiesi sanda' maola otamba saloma isima hiesi agof a'asi sape owina enis epesi, esis hiesi sawis sandambaho' sape hul maim mape etapi ea' mape nomona owah lu'wami mape halafutagwi. ¹⁶Ea' sofala halafutagw amama hiami maloma owah hiami sa'i,

“Ipe' mehip kwa'ilipei pewai pepe'i'apa ma pembahe'apa ma amaga anan natoma balata kingi naloma okom wandafunai ma sipsip noganai. ¹⁷Dei' main, nemaf anama lu'unai ma ukup amam biam wandafuma mogwa waf aonai dei' nataga. Atuwasi emi la'ifina nitu nikila' amam? Owa'etin.”

Esis Israel hiesi 144,000-peleis sefa' ikwaf Godi

7 ¹Amama mafe'ma ea', ae' ati ensel biamibiam maitu wa'owa'ola biefigin biefigin etap nafe' netambela, mahapila uf hianai etapanai ma uf ina la'ifina nehapusa etap o naoh embel lu'wami o nefa' anona lawag nenda' felifal, owa'. ²Ea' ati anona ensel nafe' nalata ilif aon natefima. Anan nahapila ikwaf la'ifinai Godi nape namunai na'i nosaho' epes sanda' maol Godi. Ea' nofala ensel amama biamibiam God nase'ama pepel ma mohambombaga etap naloma naoh. ³Anan na'ipam mehip na'i, “Dei' ipe' ina pehambombaga etap noloma naoh moloma lawah maim,

owa'. Ata' owa'. Afa' wa'i osaho' epes isima sanda' maol God ape'inai osahe'as uli'. Nambimb andeande' pehambombaga amamaga amama.”

⁴Ea' ame' esis sa'i esis amam nematawa isima ma'uma'wis ensel anama nasahe'as. Esis nasahe'as ea'i sataga na'ama 144,000. Esis amam nematawa hiesi wambotagw hiami epes Israeli. ⁵Dei' esis 12,000 epes hiesi esis wambota Judai saloma 12,000 epes hiesi wambota Rubeni saloma 12,000 epes hiesi wambota Gati. ⁶Ea' esis 12,000 epes hiesi wambota Aseri saloma 12,000 epes hiesi wambota Naptali saloma 12,000 epes hiesi wambota Manasei. ⁷Ea' 12,000 epes hiesi wambota Simeoni saloma 12,000 epes hiesi wambota Livai saloma 12,000 epes hiesi wambota Isakari. ⁸Ea' 12,000 epes hiesi wambota Sebuluni saloma 12,000 epes hiesi wambota Josepi saloma 12,000 epes hiesi wambota Benjamini.

Esis amam nematawa hiesi wambota launai sanda' lotu ma God

⁹Amamaga amama hi'alam, ae' ata' atologon wapoti' ati esis amam nematawa hiesi endilisi safi'i sondowa'anima sape. Ea' ina enin epen la'ifina niamba epes isima sataga ma'uma'wis, owa'. Esis hias endilisi. Epes isima sape etap kantri hiagoma ea' epes hiesi sape wambotagw hiami ma alop anama naninani, diga hianai naninani, isima hiesi hi'alas.

Esis saitu anama God natoma balata king ma naep sipsip noganai. Sala anom luwaguf afitimi laumi, sahapila bagah lagof اساسimi. ¹⁰Ea' soga sa'i mehup na'ama sa'i,

“God ape'inai Anan natoma balata kingi naloma Sipsip noganai, amam biam mofa'apa motanimani ma makwaha waf aonai ape' manda'anai.”

¹¹Ensel amama hiami mandatama hi'alam maitu anama balata kingi ea' agufumi amama 24-peleim maloma amamaga amama biamibiam mape namumi mape mitimalo' mati etap felefele'ma balata kingi manda' lotu mandanifela God. ¹²Amam ma'iam na'ama ma'i,

“Endilisi! Ape' mandanifel endilisi ma God ape'inai mafela agel ananinai lu'una! Anan Dembinai ofagonama howalagon. Anan nomonas hiami bu'wami mapaina ea' ape' manifelona mafela agel ananinai! Anan pepel hiamunai endilisi! Pepel lu'unai napoma Anan! Amama hiami ananiami atom la'ela'ef. Endilisi!”

Nimanimi esis amam nematawa hiesi hi'alam dei'

¹³Ea' anona amam agufumi amama 24-peleim nahali'i na'i, “Esis isima sala luwaguf afitimi, esis emi egafis? Esis safi'i enima?”

¹⁴Ea' agwamana basef a'i, “Dembinai ae'inai, ine' etina negawas.”

Ea' Anan na'ipi na'i, “Epes isima fowa' sape etap sofa' nimanimi lu'wami ma lagof esis naumbih. Esis sasa'opa luwaguf اساسimi ma esimbel

sipsip anama noganai, dei' mataga afitim. ¹⁵Ea' saitu balata king Godi natologoma. Owamb alip sanda' opeh ananiami ipat ananinai. Anan nape balata anama kingi, anan atona anona nemaf nope nolomas nili'akwas. ¹⁶Esis ina anona nemaf nolomohas wapoti', ina soga'ma embel iap nose'as wapoti', owa'. Owaf ina anona nemaf la'ifina nohas, ea' ina anom nif lu'wami mihihi'as sope, owa'. ¹⁷Dei' main, sipsip noganai naitu felefele' endilisi ma balata kingi, anan nope numafias. Anan no'was safe'ma embel amama mataga anona ifata ma sofa' embel amama ambal namunai napaimi. Ea' God anona nemaf nupati'amasa embif hiami naep asasimi ma esis ina ata' selef wapoti', owa'."

Sipsip noganai nahape' tep anama nafe'ma 7i

8 ¹Ea' sipsip noganai nahape' tep anama nafe'ma 7i nowa' buk anama ea' ina ata' owa' anom amamaga monda'am, owa'. Ea' ina anom basef mataga heven mape mafe' mafe'ma nogota si'i awa tu'waninai, owa'. ²Amama mafe'ma ea', ati ensel amama 7-peleim la'ela'ef maitu naep Godi mofa' biugel anama 7-pelaina nandandam.

³Ea' anona ensel nafi'i naitu felefele'ma balata sondolali ma Goda. Nahapila anona plet gol ama nonda' nogoh alogw bu'wami ma'ami. Esis sase'ana sanda hiami ma nonda' nogoh amama ma anan nokolasom moloma beten amam nematawa hiesi Godi. Ea' nanda' ofa ma God balata anama sanda' gol sanda'anai notawa felefele'ma balata kingi. ⁴Ea' nogoh maloma sanda amama alogw ma'ami maloma beten esis amam nematawa Godi, amama mandatama etifigin malata ilifa naep Godi. ⁵Ea' ensel anama nofa' plet anama do'ok sanda amama malami ea' nofa' nifa balata sondolalima Godanai nowalam plet, ea' nakwahom muwai etap. Anan nakwahom ea', otaga holala, anom amamaga mataga manda'am, howalagon nafe' sowambon lu'unai nasol etin nape.

Ensel biamibiam mufapula biugel amamunai

⁶Ea' ensel amama 7-peleim mahapila biugel anama 7-pelaina mandandombola mufapula biugel anama. ⁷Ensel nali'i nofapula biugel ananinai ea' ais afitimi si'i otamba pohalami maloma nif maloma esimbel lola'am mataga heven ea' nokolo' ais maloma esimbel mowai etap. Amam mawaloga etap hiagoma naloma lawah hiami mataga wenifigin. Ea' nif fando etap wa'agon ea' biefigin nape. Ea' otalef hiami maluwi amama wapoti' ea' nif fandom hi'alam.

⁸Ea' ensel anama nafe'ma bifi nofapula biugel ananinai, esis sakwaha anom amamaga si'i halaf fandonai nandegia nafe' nowala naoh. Ea' sawala naoh mataga wenifigin ea' wa'am mandamboma mataga esimbel biefigin nape bo'wagon. ⁹Ea' sawaloga amamaga amama hiami mape naohi ambagof namumi mapaimi sawalogam mataga wenifigin ea' wa'am

maga' biam mape bo'om. Ea' sawaloga sip hiami mafe' naohi wapoti' sawalogam mataga wenifim ea' wa'om aom biam mape bo'om.

¹⁰Ea' ensel anama nafe'ma wanomi nofapula biugel ananinai, anona ondo'w lu'unai nandegia heven fandona fofol etin si'i nempa'w fandonai nowai etap. Esis sawaloga walembah hiami maloma embel hiami motah etapi sawalogam mataga wanom ea' ondo'w anama nafe' nowala embel tu'wanim motah wa'ili. Wa'el aom ea' wa'ol biefigin mape bo'om.

¹¹Ondo'w agili'nama anama sa'i, marasin Anama Numbutinai. Ea' sawaloga walembah embel hiami sawalogam mataga wanom, ea' wa'om mataga si'i marasin numbutinai. Ea' biefigini mape bo'om. Ea' epes hiesi sa' embel amama awami maofa opalef اساسي saga' hi'alas.

¹²Ea' ensel anama nafe'ma biamibiam nufapula biugel ananinai, esis sawaloga aon owambunai alipunai naloma ondowa sawalogam mataga wanom. Ea' sahambobaga wa'om mataga akutim. Ea' nemaf a'ipanama sawalogana wanom. Etifigin akutigin, biefigin howalgon. Ea' owamb tu'wanina na'ama etin si'i alip.

¹³Ea' ati anona komon lu'unai nufia' nafe' la'afen gani ilif ame'ana na'i mehip na'i,

“Uwahipis uwahipis endilisi esis amam nematawa sape etapi ma nimanimi lu'wami wapoti' motagamas. Dei' main, anom ensel wanom ma'i mufapula biugel amamunai ma nambimb nimanimi amama motagamas!”

Ensel nafe'ma wanom biami nufapula biugel ananinai

9 ¹Ea' ensel anama nafe'ma wanom biami nufapula biugel ananinai, ati anona ondo'w nakwaha heven ilif nowai etap. Ondo'w anama anona ensel. Ea' esis sase'ana ki utainai ma anona hul nagal nowala etap owin. Hul anama owa' nefe' notambili nowala nafe' etin. ²Anan nawisi' uta hul anama ea' nogoh lu'wami mataga si'i nogoh malo nif lu'wami. Ea' nogoh amama malo mase'ala aon ilif, ea' aon alipunai naloma owambunai mataga akutim. ³Ea' anom asagof si'i kwamu'wis lu'wami makwaha nogoh amama mowala etap. Ea' ensel anama nase'am pepel si'i pepel sipiawa mape etapi maha epesi. ⁴Ea' mofa' basef na'ama ma'i,

“Ipe' ina pehambobaga otalef o amamaga mamumami mataga etapi o anom lawah, owa'. Ipe' pehambobagago epes amama atom ikwaf Godi owa' notoma amagah اساسي.”

⁵Ea' amam amama la'ifima mose'asa nimanimi epes isima mefe' mondahama aomb wanom biam, ea' ina mofa' pepel ma mohas sogal, owa'. Ea' mase'asa nimanimi lu'wami endilisi ma epes isima si'i sipiawa maha epes same' nimanimi lu'wami. ⁶Nemaf anama epes hiesi sogolopa eafa si'i seaga', owa'. Ina sati anona. Ga' nambimb nondafa'mas sofa' nimanimi lu'wami sope la'ela'ef. ⁷Ae' ati asagof amama si'i hos

mandondombol ma'i mopa'. Balagahima mandati si'i hagw dembemi atom mowalo'ami sanda' gol sanda'am matoma balagah amamumi. Ea' amagah amamumi si'i naep epesi sanda'am. ⁸Balagah amamumi auf laomi si'i balagah nematawai. Nalelef amamumi si'i nalelef mafis wandafumi laionim. ⁹Mafatagw amamumi mala siaogw si'i dunduwiw si'i agofum pepel ea' behenagof amamumi manda'am mehip si'i hos mahondo' wilkar lu'unai hianai masagih mafe'ma wandaf. ¹⁰Ahagwalef mailam si'i sipiawa ea' nalelef motawama moha hiesi mose'asa nombot aonai sefa' nimanimi lu'wami. Amama mape ahagwalef. Ahagwalef amamumi pepel ma moha epes aomb amama wanom biam. ¹¹Amam anona king amamunai numafiam. King anama anan ensel numafi hul anama nagal nowala gani owin endilisi, nafe' etini. Diga esis Hibru'i sa'i agel ensel anama sa'i, Abadon. Diga esis Griki sa'i, Apolion. Ofagema ma'i, "Aman nohambombaga amamaga hiami."

¹²Nemaf aonai ma nimanimi lu'wami mali'i hi'alam. Ea' peme'! Nimanimi biefim ata' mapani nambimb motaga migi'.

Ensel anama nafe'ma wanom wanomi nufapula biugel ananinai

¹³Ea' ensel anama nafe'ma wanom wanomi nufapula biugel ananinai, ame' anona malogel na'i natagai balata sondolalima Goda sanda' gol sanda'anai da'malifinama to'wan to'wan notawa naep Godi. ¹⁴Malogel anama na'ipa ensel anama nufapula biugeli na'ama na'i, "Ensel amama awami biamibiam manda' kalabusa walemb lu'unai Yufretis, ine' nekwaha amam mofo'o."

¹⁵Ea' nakwahom mafe'ma nambimb meamba esis amam nematawa hiesi sape etapi mowalogas sotaga wenis ea' moha epes hiesi wa'ol sogal, biefis sope bo'wes. God nanda' ensel amama mandondombol mape mohafa aua anama ma nemaf anama ma aon anama ma afagel anama atona ma monda' opeh amama. ¹⁶Ae' ame' soldia hiami endilisi 200 milian matoma hos amamumi. Ame' seambam mataga hiami endilisi. ¹⁷Ape si'i a'oh andondo'ah ati amam matoma hosi. Amam soldia mala siaogw kapaimi atom. Siaogw amama akwahimi alimi kolotuwaimi maloma batafumi. Balagah hosim si'i balagah mafis wandafumi lu'wami laionim. Ea' nif fandom nogoh mataga otamba batafumi salfa fandom mataga malogof amamumi. ¹⁸Amam meamba esis amam nematawa hiesi mawalogas sataga wenis ea' maha wa'ol afisa amamaga amama awami wenifim, nif maloma nogoh maloma otam salfa fandumi mataga malogof hosi. Ea' epes hiesi biefis sape bo'wes. ¹⁹La'ifimi hosi mape malogof maloma ahagwalef amamumi. Dei' main, ahagwalef amamumi si'i iguf, balagah mandandam. Ea' dei' maha epesa ahagwalef amama amamumi.

²⁰Enis epes hiesi ina afisa amamaga amama awami wenifim, ina samboma opalefa sakwaha waf aonai, owa'. Esi ina sowa' alafugaha

amamaga amama sanda'am lagof asasimi, owa'. Esis ina dei' sakwaha waf anama sanda' lotuma ambagof awami maloma god anama baso'omunai sanda' goli siliwa, bras otamba o lawah hiami maim sanda'ami, amamaga amama ina mati o maitu mafi'i, mame' basef, owa'. ²¹Epes isima saha enis epes saga'i, sanda' ma'akw sanda' ufiali ea' saila waf so'a waolanai, sanda' wali. Ea' esis ina samboma opalefa sowa' alafugaha waf anama aonai, owa'.

Anona ensel nase'ana buk Jon nagwa'ana

10 ¹Amama hi'alam, ati anona ensel la'ifinai nisila'i heven. Anan nandabaho' elagw ea' elelina naloma balaga ananinai. Amaga ananinai nafil howalagon endilisi si'i aon alipunai nalatawi ea' bo'wagah ananiami si'i nif fandom malata ilif. ²Anan nahapila anona buk so'unai lagof ananiami, nandauf na'oh. Anan nawamona bo'waga ananinai da'isinai natoma naoh ea' aonai nahaponana etap wata'ita. ³Ea' nogal na'i mehip endilisi si'i mafin lu'unai laion nanda'am. Nanda'am na'ama ma ea', otaga dilili bugwalag 7-peleif. Ma'i si'i anona malogel na'i. ⁴Otaga dilili bugwalagw 7-peleif ma'i basef ea', a'i enda' anom basefa amama, ea' ame' anona malogel na'i nataga heven na'i, "Basef amama otaga dilili bugwalagw 7-peleif, amama ine' nembaho'wam mope okom ine'inai atona. Ina nenda'am mil buk, owa'."

⁵Ea' ensel anama ali' atolona naitu naoh maloma etap wata'itai anan nasa'ma lagel da'isinai nalata. ⁶Ea' na'iam endilisi gani ilifa agel Godi nape namunai la'ela'ef hihif. Anan nanda' ilif naloma etap naloma amamaga hiami ambagof mapaimi maloma amama ambagof a'ami mape ilif etapi maloma naoh embel lu'wami maloma amamaga amama hiami mape naoh owin wapoti'.

Ea' ensel anama na'i, "Nogota mape mohafanai dei' hi'alana. ⁷Nemaf anama ensel anama nafe'ma 7i ni'i nufapula biugel ananinai, amamaga amama God nambahe'ami motaga alihim. God felefele' nonda'am endilisi si'i basef fowa' nase'amam amam profet manda' opeh ananiami."

⁸Ea' malogel fowa' ame'ana heveni na'ipi wapoti' na'ama na'i, "Ine' fo'o fa'ai buk anama nandauf nape lagel ensel naitu naoh maloma etapi."

⁹Ea' afe'ma ensel anama a'ipana a'i, "Ine' se'e buk anama so'unai."

Ea' na'ipi na'i, "Ine' fa'ana nea'ana. Anan atuwasi usihina si'i aupimbel malogel ine'inai, ea' opaf ine'inai numbutina."

¹⁰Anan na'iam ea', afela buk anama so'unai lagel enseli agwa'ana. Ea' malogel ae'anai usihina si'i aupimbel hani. Agwa'ana ame' numbutina opaf ae'anai.

¹¹Ea' ame' anom basef sa'ipi sa'i, "Ine' newalapa basef Godi wapoti' ma amamaga nambimb motagama epes amam nematawa alop naninani hianai ma diga anama hianai naninani ma amam king dembemi hiami wapoti'."

Amam biam mawalapa basefi

11 ¹Ea' esis sase'e ikwaf ae' ma indila'wifa amamaga dende'am etin sa'ipi sa'i, "Ine' hafel nembe' ikwafa ipat lu'unai Godi noloma balata anama sondolalima Goda. Ea' neamba esis amam nematawa sanda' lotu ma Anani sataga ma'wis. ²Ea' ina nenda' endaleleb amama mape ande'ma ipat anama, owa', hapaimi. Dei' main, endaleleb amama esis amam nematawa sololoma Godi sofa'am. Ama esis anona nemaf sotaga sohambombaga wambel lu'wagoma Godi bu'unai sope sefe' sondahama aomb 42-peleim, afagof si'imi wanom tu'waninai. ³Ea' nambimb Ae' God esapa'o amam amama biam ae'ami enda'am la'ifim mowalapa basef Ae'ami. Ea' amam nambimb mowaho' begah wa'amiⁿ si'i luwaguf awami ea' mi'ipasa basef Ae'ami mofe' mondahama nimeguf 1,260-peleim, afagof wanom tu'waninai."

⁴Amam biam si'i lawah oliv biam maloma lamifah biam la'ela'ef motawa naep Dembinai ma etap hiagomai. ⁵^pI'i enis epes si'i sonda' amam biam aom, atuwasi nif motaga malogof amamumi fendo esis naumbih amamisi endilisi. Endilisi, emi egafin ni'i neham, waf anama atona enin nega'. ⁶^qAmam biam la'fima mosopama otaga ma asaf owa'etina nimeguf hiami mawalapa basef Godi. Amam agel lu'unai ma momboma embel hiami motaga akwahim si'i esimbel ea' mofa' pepel lu'unai ma moha esis amam nematawa etapasi ma amamaga awami mamumami. Maina nemaf amam mi'i monda'am na'ama, amam la'ifima monda'am.

⁷Amam mowalapa basef Godi hi'ilam, anona mafin lu'unai aonai nokwaha hul anama nagal nowala etini nolatawi ilif. Ea' okom numbutina nopa' nolomam. Ea' noham nofofo'asom ea' afum. ⁸^sEa' alop amamunai no'oh eaf lu'unai taun anama lu'wagoma, ape' ma'iagon basef womun etin ma'i agel Sodom naloma Isip. Anama taun anama etin fowa' esis saha Dembinai amamunai naga' lawag usi'inai tu'waninai. ⁹Enis epes alop hianai naninani sape wambel etap hiagomai saloma esis diga hianai naninani, epes hiesi siti alop amam biami la'ela'ef sondahama nimeguf wanom si'ina tu'waninai. Ea' esis ina si'i aho'ma enis epes sowam hi'agilif, owa'. ¹⁰Ea' esis amam nematawa etapasi sondanifel ma amam maga' ea' sonda' gwa'aimi sea'am sealemb ea' sandaso'ama amamaga bu'wami maloma alupisi asasisi. Dei' main, profet amama biam mase'asa nimanimi lu'wami amam nematawa hiesi sape etapi.

n Basef amama amam amama biam mowaho' begah wa'ami si'i luwaguf awami ma'i amam mondola'wifa amam ukup aoma esis owa' somboma opalef sofe'ma God. **o** **11:4** Sek 4:3,11,14 **p** **11:5** 2 Sml 22:9; 2 Kin 1:10; Sam 97:3; Jer 5:14 **q** **11:6** 1 Kin 17:1; Eks 7:17,20; 1 Sml 4:8 **r** **11:7** Dan 7:21; Re 12:17; Re 13:1,7; 17:8 **s** **11:8** Lu 13:34

¹¹ Nimeguf si'imi wanom tu'waninai hi'ilam, God nosapa'i ambip Ananimi mofe' muwis nomona amam biam ea' ambal nopaim mohafel mitu. Ea' epes sotolom umbamahs endilisi. ¹² Ea' mome' anona malogel ni'i notagai heven nofalam mehipe na'ama ni'i, "Ipe' bipa letowi na'ae ilif!"

Ea' mofe' heven muwis elagw nomon esis naumbih situ sotolom mofe'. ¹³ Nogota anama atona, sowambon lu'unai nokoto' taun anama lu'wagoma tu'wanigin pe'ogon ea' 9-peleigin ata' nope bo'wagon. Ea' esis amam nematawa 7,000-peleis sog'a' ma sowambon anama. Ea' esis enis amam nematawa seapani esis umbamahs endilisi, sefela agel God nape heveni. ¹⁴ Amamaga nimanimi lu'wami mafe'ma bifi amama mafe' hi'alam, ea' peme'! Nogota bandana ma nimanimi lu'wami mafe'ma wanomi motaga.

Ensel anama nafe'ma 7i nufapula biugel ananinai

¹⁵ Ensel anama nafe'ma 7i nufapula biugel ananinai, anom malogof moga ma'i mehipe matagai heven na'ama ma'i,

"Dembina'i ape'inai naloma Kra'is Amam biam dei' mefa' pepel mataga king dembemi etap ana'e' hiagoma mumafiagon. Ea' Anan nope king Dembinai la'ela'ef hihif!"

¹⁶ Ea' amam amama agufumi 24-peleim natoma balata lu'unai amamunai ma naep Godi mape etap mindiwa balagah amamumi mati etap manda' lotu mandanifel ma God ¹⁷ma'i,

"Dembina'i, ine' God pepel hianainai. Fowa' gani endilisi ine' napani, dei' ine' nape. Ine' dei' nefa' pepel hianai ine'inai nape king Dembinai numafi epes saloma amamaga hiami. Ea' afa' wanifelina.

¹⁸ Esi sololama Godi opalef aom ukup numbutim, ea' dei' okom ine'inai wandafuna nataga ea'. Dei' nemaf ine' newaloga esis saga'i ma sotagama kot. Dei' nemaf ine' nose'asa amamaga bu'wami ma amam profet manda' opeh ine'imi. Dei' ine' nose'asa amamaga bu'wami esis amam nematawa ine'isi saloma isima hiesi sanda' lotuminai sape owina ine', esis agufisi saloma isima agof a'asi wapoti'. Dei' nemaf ine' neha epes isima saha epes sape etapi!"

¹⁹ Amam ma'iam ea' ipat lu'unai Godi nape heven nandawisi' ea' bokis bu'wami amama mi'uli Godi napaimi amama mataga ma'oh alihiguma nomon ipat Ananinai. Ea' otaga holala pelepele', dilili bugwalagw nafe', etap nalemb etin asaf lu'unai ondowa lu'wamunai si'i otamba mambip mowai.

Nemata'w kwaloma kwambon lu'unai

12 ¹ Ea' anona ikwaf lu'unai nataga heven nape na'ama. Ano'w nemata'w kwape kowaho' aon alipunai alop akwa'unai si'i

lowaf. Ea' aon owambunai nape owina bo'wagah akwa'umi. Ea' anona hat awau agufuwai atowa owalo'omi natoma balaga akwa'unai. Ondowa 12-peleiwa wailana. ²Ea' akwa'w opafu'w kwame' nimanimi amama matagama'wa kola awani. Ea' kwawal kwalef kwa'oh mehipe. ³Ea' anona ikwaf nataga heven nape na'ama. Anona kwambon lu'unai nape. Anan akwahinai balagah 7-peleim mandandana, wambawa mataganai 10-peleim. Ea' hagw 7-peleim dembemi atom mowalo'ami matoma balagah ananimi. ⁴Andep kwambuni nambefa wa'am sawaloga ondowa mape ilifi sawalogom mataga wenifim nambefam mowai etap. Ea' dei' biefim mape ilif la'ela'ef. Ea' kwambon anama nafi'i naitu naep nemata'w kwa'i kola awani, naitu nohafa akwa'wa ata' kolani, mehipe nogwa'an.

⁵Ea' nemata'w akwama kola awani aman. Awani inima anona nemaf owagama la'ifina numafi esis amam nematawa hiesi sape kantri hiagoma. Anan la'ifina nohapila bandan sanda' ain sanda'anai nope dembinai numafias. Akwa'w kolan, mehipe esis sofa'an safe'ma balata king Godi nape andeande'. ⁶Ea' kwasagih kwafe' anagon wafiguma fatauguma. Anama God nandondombagona akwa'w. Ama nambimb enis epes sumafia'w sose'akw gwa'aimi akwa'w dahama dahama nimeguf 1,260-peleim, afagof wanom tu'waninai. ⁷Dei' wandaf lu'unai nataga heven. Ensel dembinai Maikel naloma amam ensel ananimi mapa' maloma kwambon anama lu'unai. Ea' kwambon anama nao'wa amam ensel awami ananimi magwamama wandaf amam mapa' malomam wapoti'. ⁸Ea' kwambon naloma ensel ananimi amam ina la'ifima muli'amona wandaf, owa'. Dei' amam ina ata' mapani gani heven wapoti', owa'. ⁹Ea' amam ensel Godi makwahai kwambon anama nisila'i. Kwambon anama fowa' ganinai dei' esis sa'i aman aonai Satan. Anan aman nambaso'ma esis amam nematawa hiesi etapasi. Amam makwahai anan nafi'i etap, makwahai ensel awami ananimi wapoti' misila'i malumanai.

¹⁰Ea' ame' anona maf na'i mehipe nataga heven na'i na'ama na'i, "Dei' God ape'inai nefa'apa mutanimani pepel ananinai nataga nandawalap alihiguma ma nope Dembinai king! Krai, God nandandepana nasapa'ana nafi'i Anan la'ifinai nefa' agel lu'unai ea'. Dei' main, aman anama nambaso'ma alupusi sahin owan ape'isi owamb alip na'ipa God ape'inai na'i esis sanda' waf aonai. Ea' dei' amam ensel Godi makwahona nisila'i ea'. ¹¹Esis alupusi sahin owan ape'isi sofa' pepel ma esimbel sipsip noganai sawalipasa basef ananimi endilisimi. Esis sanda' waf anama. Amama atom dei' silai'ipa wandaf sali'amona naumbih ma amama. Esis ina ukup ma'ima'i endilisi ma sope andeande' etap anae', owa'. Esis ina umbamahasa naumbih sohas sog'a, owa'. ¹²Ipe' hipei pape heveni, ipe' pendanifel! Ipe' pape etapi paloma sape naoh embeli, uwahipipa! Dei' main, nimanimi lu'wami ma'i motagamepa. Satan nisila'o ma ipe', anan

okom wandafuna endilisi. Dei' main, anan nogawa nogota bandana ma nope nonda' opeh ananiami, felefele' higililana.”

¹³Amam ensel makwahai kwambon anama lu'unai nisila'i etap dei' nagawa anan nafi'i nape etap nati nemata'w akwama kola awani aman natofa'w. ¹⁴Ea' sase'akw behenagof biam lu'wami komonimi akwa'w la'ifikwa kufia' kofe' wambel akwa'unai etap wafiguma fatauguma. Ama ata' kope laogona kwambon anama lu'unai ma esis sumafia'wa gwa'aimi solaga'w kofe' kofe' kotambel afagof wanom tu'waninai. ¹⁵Ea' kwambon anama lu'unai nagu'wai embel malogel ananinai. Embel amama mataga si'i anona walemb lu'unai kolo' etin mafe' magi'ma akwa'w. Kwambon anama na'i embel amama mondahago akwa'w kofe' hegilila'w. ¹⁶Ea' owa'. Etap nagiambama'w na'ama. Malogel etapi nagal alihina na' embel amama kwambon nagu'ami malogel ananinai hi'alam. ¹⁷Ea' anan okom numbutina endilisi ma akwa'w nafe' na'i nonda' wandaf noloma enis batawisa'w akwa'usi, esis amam nematawa isima saila mi'uli hianai Godi sawalapa basef Jisasi sailam. ¹⁸Ea' kwambon anama nafi'i naitu naoh akata.

Mafis biam aolupumi mataga

13 ¹Ea' ati anona mafin nape aolupi nataga naoh embel. Wambawa mataganai 10-peleim ea' balagah 7-peleim mapaina. Wambawa amama mowalo' hagw dembemi atom mowalo'ami matoma wambawa mandandam. Balagah ananiami sanda' anom agof mail mandandama balagah amama. Agof amama ofagema na'ama. Basef mamumami awami findiwaimi ma God. ²Mafin anama dei' atolona, anan si'i anom mafis lu'wami wandafumi wanom. Anona mafin agel lepat ea' bo'walelef ananiami si'i bo'walelef anona mafin bea, malogel ananinai si'i malogel anona mafin laion. Ea' kwambon anama nanda' mafin aolupunai nataga la'ifina ma pepel lu'unai ananinai. Anan nanda' mafin anama nataga dembinai ma numafi epes hiesi fowa' anan numafiasi. ³Mafin anama balagah 7-peleim anona melet natomana si'i sahana afuna. Ea' balaga anama nambo'wana dei' wafi'igin, ambo'ona wapoti'. Ea' epes hiesi sape etapi sohafel gegelalasis kwapete'asa mafin anama aolupunai owa' afunae, sailona. ⁴Kwambon anama nase'ana pepel ananinai mafin anama aolupunai. Ea' esis hiesi sanda' lotuma kwambon anama naloma mafin anama aolupunai wapoti' safela agel ananinai sa'i, “Emi nandati na'ama etin si'i mafin aolupunai anama? Owa'etin. Emi la'ifina nepa' nelomana? Owa'etin.”

⁵Ea' dei' God nape nati mafin anama na'i mehup na'i basef awami findiwama God. Anan la'ifina nape dembinai ma nanda' waf anama nape nogota laona aomb amama 42-peleim, afagof wanom tu'waninai. ⁶Malogel ananinai noga na'i basef awami nanda' findiwama God. Anan

nanda' agel Godi findiwana wambel Godi naloma wambota anama ananisi sape heveni. ⁷Ea' God ata' nape nati anan ata' nape la'ifina nefela wandaf nopa' noloma esis amam nematawa Godi ea' naitu nanda' wandaf nahagofas. Anan nofa' pepel ma kwambon anama ea' la'ifina ma nope dembinai la'ifinai ma esis epes hiesi sa'i diga anama hianai ma etap anama wambel hiagoma, alop naninani. ⁸Anona buk ambal namunai napainai na'oh. Esis sanda' agof epes Godi etis mape buk anama ma nogota anama fowa' gani God nanda' etap anae'. Buk anama sipsip anama noganai fowa' esis sahana naga'. Amam nematawa hiesi etapasi agof asasimi owa' mope buk anama, epes isima hiesi sanda' lotuma mafin anama. ⁹Ipe' epes aligah magalipei, ipe' peme' basef amama na'ama. ¹⁰I'i esis si'i sonda' enin epen nefe' nenda' kalabus, enin nefe' nenda' kalabus. I'i esis si'i soha enin epen noga'ma bainat, enin noga' ma bainat. Endilisi waf anama nimaninai atona anona nemaf notaga. Ipe' amam nematawa Godi pepe la'ifipa pembale'efa God la'ifipa andeande'.

¹¹Ea' ati anona mafin aolupunai wapoti' nohafel nawisi etap owin nalatawi ilif. Wambawa biam matagana si'i wambawa mataga sipsip nogami, ea' basefa diga ananinai si'i malogel diga anona kwambon lu'unai. ¹²Mafin anama naitu aolupi na'i nafe'ma bifi nefa' pepel ma mafin anama nali'i ma numafi epes hiesi. Ea' nanda' opeh la'ifimi ma naep mafin anama nali'i. Anan nanda' opeh la'ifimi endilisi ma nonda' esis amam nematawa sape etapi sonda' lotuma mafin anama nali'i, fowa' sahana sa'i nomboma noga' dei' wafi'ina ea'. ¹³Mafin anama nagi'i, anan nanda' pepel lu'unai naninani. Pepel anama lu'unai na'ama. Naep esis amam nematawai, nanda' nif makwaha heven misila'i etap anae'. ¹⁴God ata' nape nati anan nanda' pepel anama naninani ma naep mafin anama nali'i. Ea' anan nagi'i nanda' waf anama ma nahambombaga esis amam nematawa etapasi. Na'ipas mehip na'ama na'i, "Ipe' pendomba ambala mafin anama nali'i nil anona lawag maina ma pefela agel ananinai lu'una. Mafin anama nali'i ma'una anama fowa' bainat nahana ata' nape namunai la'ela'ef."

¹⁵God nape nati mafin anama nagi'i na'i aho'ma anan nase'ana ambal ambagof mapaimi ma ambal anama mafin aolupunai sanda' lawag sanda'anai. Ea' ambal anama noga na'i basef ea' la'ifina ma noha epes sandaiwa'ma sonda' lotuma anani soga'. ¹⁶Ea' mafin anama nagi'i la'ifina nasasapa' epes isima hiesi sonda' anona ikwaf nepe atona etin esis lagof da'isimi o amagah asasimi. Ikwaf epes isima agufisi soloma epes agof a'asi soloma isima otamba hiamisi soloma isima wafisi. Ea' enis agof a'asi sanda' maola enis epes soloma enis agufisi wapoti'. ¹⁷Ea' epes hiesi sofa' ikwaf anama ma agel mafin anama nape aolupi. Ea' enis sofa' anona namba ma mafin anama agilinama. I'i emi egafis owa' sefa' ikwaf anama, esis ina nambimb sotala amamaga epesi, ea' esis wapoti' ina nambimb

sotala amamaga asasimi, owa! ¹⁸Ape! ukup mope la'ifim andeande'ma amama. Emi egafis segawa, esis seamba namba mafin anama aolupunai andeande!. Namba anama basef womun etina anona aman. Namba anama 666.

Esis 144,000-peleis sanda' awalef dambaimi

14 ¹Ae' atologon wapoti' ati sipsip anama noganai naitu halaf Saion ea' amam nematawa hiesi endilisi 144,000-peleis saitu salomana. Agel sipsip noganai naloma agel ahalomana ananinai agof amama mail amagah asasimi. ²Ea' ame' anom amamaaga manda'am mafi'i gani heven si'i embel mowa kululu' etin mafe', si'i otaga dililuwala mehup. Ae' ame' maf anama si'i epes saha gita naloma musik manda'am. ³Esis sanda' anona awaf dambainai ma anama balata lu'unai Godi notawa natologoma, ma naep amamaga biamibiam mape namumi maloma naep agufumi 24-peleim. Amam nematawa isima hiesi endilisi 144,000-peleis, God natalis la'afena epes hiesi etapasi, amama atom la'ifisa sogawa awaf anama. Ina enis epes wapoti' la'ifisa sogawana, owa! ⁴Epes isima sape bo'wes endilisi. Amam ina manda' waf aonai maloma nematawa, owa!. Mape bo'om. Wambel anama sipsip noganai na'i neafe'ma, esis sagi'mana same' basef ananiami sanda' maol ananinai. God natalis la'afena esis amam nematawa hiesi etapasi sape sali'i si'i ofa bu'unai nali'i God naloma sipsip noganai mofa'anai. ⁵Esis ina sanda' anom basef kwamaimi baso'maimi, owa!. Esis basef ofagema ma waf aonai a'as.

Ensel wanom ma'i anom basef

⁶Ae' ati anona ensel nufia' nafe' gani ilif. Nofa'ai basef bu'wami Godi mape la'ela'efi nanda' opeh amama ma na'lipasa basef amama esis amam nematawa hiesi sape etapi. Nawalapama epes hiesi sape kantri hiagoma gani etap hiagoma sa'i diga naninani ma alop naninani hianai. ⁷Anan noga na'i mehup na'ama na'i, "Nogota nataga ea' ma God nowaloga epes hiesi ma kot. Ipe' umbamehepa ma Anan pila basef ananiami, pefela agel ananinai. Ipe' penda' lotuma God, Anan nanda' heven naloma etap naloma naoh embel maloma embel amama hiami mataga etap owini."

⁸Anona ensel nag'i'mai ensel anama nali'i nafi'i na'i anom basef na'i, "Wambel lu'unai Babilon anama aona ea! Anan awagon ea! Epes sape wambel anama sanda' esis amam nematawa hiesi ma saila waf anama sanda' so'a waolanai. Waf asasinai aona si'i wain la'ifinai nanda' epes ukup mase'as. Wambel anama Babilon nase'as embel wainim amama epes hiesi wambel hiagoma sagwa'ami."

⁹Ea' anona ensel nag'i'ma amam biam nafi'i. Ensel anama nafe'ma wanomi noga na'i mehup na'ama na'i, "Emi egafis sonda' lotu ma mafin anama nape aolupi ma ambal ananinai sandombanai ma nefa' ikwaf

anama amaga lagof اساسيمي, ¹⁰esis nambimb sope si'i sogwa' anona wain. Wain anama basef womun etina okom wandafunai Godi. God ina nati uwahipis, owa'. Anan okom wandafunai lu'una endilisi. Anan anona nemaf nese'as okom wandafunai epes isima ma nogwa waf aonai esis sanda'anai. Ama epes isima sofa' nimanimi lu'wami ma nif fandumi mahihi'asi ma otamba agel salfa nifimi ma naep amam ensel bu'wami Godi moloma naep sipsip noganai. ¹¹Nogoh mataga nif amama mase'asa nimanimi epes isima sanda' lotuma mafin anama aolupunai naloma ambal anama ananinai. Epes isima ina anona nemaf sopoma noma'w owamb alip, owa'. Nogoh amama molomolata ilif la'ela'ef mopani.”

¹²Nemaf anama nimanimi amama motaga, enis amam nematawa Godi situ la'ifis. Esis amam nematawa isima saila mi'uli Godi ma sombale'efa Jisas la'ifis andeande'.

¹³Ea' ame' anona malogel na'i nafi'i heven na'i, “Ine' da'a anom basef na'ama. Esis amam nematawa sombale'efa Dembinai saga'i, dei' nimeguf hiami anona nemaf owagama wapoti' sondanifel!”

Ambal Bu'unai Godi wapoti' na'i, “Esis anona nemaf sokwaha opeh lu'wami amama esis sanda'ami sopoma noma'w. Esis ina sope etin, owa'. God nambimb niti waf bu'unai esis sanda'anai ea' nogwamasa anom amamaga bu'wami esis. Waf bu'unai esis sanda'anai anona nemaf nondawalap alihina.”

Okom wandafunai Godi si'i waf sala' gwa'aimianai etap anae'

¹⁴Atologon wapoti', ati otaga atotona afitinai nape ea' anona epen ambal napainai nape otaga anama. Enin si'i anona dembinai nataga epen endilisinai. Anan nowalo' hat bu'unai naffili si'i gol balaga ananinai nahapila anona nogwatop hi'alina endilisi lagel ananinai. ¹⁵Ea' anona ensel nape ipat lu'unai Godi nomon nawisi ande' nofala aman anama natoma otagai mehip na'i, “Ine' topa' gwa'aimi amama maufi ma nogwatop anama ine'inai! Dei' main, gwa'aimi hiami etapami maof ea'. Amama atom dei' nogota anae' pela' gwa'aimianai.”

¹⁶Ea' aman anama nape otagai nahapila nogwatop ananinai nakwahona etap, natopa' gwa'aimi maufi etap anae'.

¹⁷Ea' anona ensel wapoti' nawisi ande' ma ipat anama lu'unai Godi nape heven. Anan wapoti' nahapila nogwatop hi'alina endilisi. ¹⁸Ea' anona ensel wapoti' nakwaha balata anama sondolalima Goda nafi'i. Ensel anama la'ifinai ma numafi nifi. Nofala ensel anama nahapila nogwatopi nofalona mehip na'ama na'i, “Ine' fa'ai nogwatop anama ine'inai hi'alina endilisi, netopa' su'utip gwa'aimi maufi mail mandelef waini etap nekolosom mo'oh! Dei' main, gwa'aimi amama hiami maof ea!”

¹⁹Ea' ensel anama nahapila nogwatop ananinai nakwahona etap, natopa' gwa'aimi su'utip akumi mail mandelef waini natamam motawa.

Ea' nafela gwa'aimi amama nakwahom mowala otam tang lu'unai nomona safo'asom wain embel. Amama mondola'wifa okom wandafunai Godi ma epes isima sosambala basef Ananimi. ²⁰Ea' safo'asom waina otam tang anama lu'unai nape ande'ma taun anama wambel lu'unai. Esimbel maluwi tang ande' kolo' etin mafe' laogon si'i 300 kilomita si'i walemb embel mafi'i matef mataga ilif motambel ain nape malogof hosi.

Ensel 7-peleim mahapila amamaga awami endilisi mandandam

15 ¹Ati anom amamaga laifimi matagai heven ea' okom natanea ma amama. Ati ensel 7-peleim mape ea' amam mahapila amamaga awami endilisi mandandama epes. I'i anona nemaf amamaga amama awami hi'ilam, ina ata' anom motaga wapoti', owa'. Dei' main, amamaga amama awami 7-peleim, amama okom wandafunai Godi ea' hi'ilana endilisi. ²Ea' ati anom amamaga si'i naoh embel lu'wami mandati si'i glas amama sanda'am maloma nif. Epes isima saitu la'ifisi sali'amona wandafa waf aonai sahagofa mafin anama lu'unai nape aolupi naloma ambal ananinai maloma ikwaf ananinai 666, esis saitu naoh amama da'malifima si'i glas. God nase'as anom musik si'i gita sahapilam. ³Esis sanda' awaf Moses nanda'mana opeh Godi naloma awaf sipsip noganai. Awaf anama na'ama.

“Dembina, ine' God pepel hianainai. Opeh hiami ine' nanda'ami, amama la'ifimi ea' afa' watolom ukup matameamam hiahiam! Ine' king numafi epes hiesi ea' waf ine'inai bo'ona endilisinai hi'alana! ⁴Dembina, ine' etina nape bo'wena. Dei' emi egafis owa' umbamahasa ine'? Owa'etin. Hiesi umbamahasa ine' sanda' lotu ma ine' etina. Emi egafis owa' sefela agel ine'inai? Owa'etin. Epes wambotagw hiami ma etap hiagoma anona nemaf sifi'i sonda' lotu ma ine' etina. Dei' main, waf bu'unai ine'inai nataga alihiguma nandawalap.”

⁵Amama mafe'ma ea', atologon wapoti' ati ipat bu'unai Godi notawa gani heven. Ipat anama nagal alihina ati nomon ipat anama nape sanda' sel sanda'anai God napeinai. ⁶Ea' ensel amama 7-peleim mahapila amamaga awami endilisi mandandam nohambamboga epes, makwaha ipat anama mawisi ande'. Ea' mowaho' luwaguf afitimi bu'wami endilisi howalagon mafifil endilisi. Mowaho' legw si'i goli managam mefetagw amamumi. ⁷Ea' anona la'afena amam biamibiam mape namumi nase'ama dis lu'wami 7-peleim sanda' gol sanda'ami mandandama amam ensel atona etin. God nape namunai la'ela'ef okom wandafunai ananinai nape si'inama dis amama 7-peleim. ⁸Ea' nogoh amama mataga mafifili ma pepel Godi, amama si'ima ipat anama Godi. Ea' ina enin epen la'ifina nefe' nuwis ipat anama nomon, owa'. Esis sape sohafa ensel 7-peleim monda' opeh hi'ilam amamaga amama awami mahapilam mandandami ata' mili'.

Dis 7-peleim okom Godi wandafunai napaim

16 ¹Ame' anona malogel na'i natagai mehup ipat lu'unai Godi nomon. Malogel anama na'i nofala ensel amama 7-peleim na'i, "Ipe' pefe' pekolo'wa dis amama 7-peleim okom wandafunai Godi napaimi ma kolo'olam mofe' etap."

²Ea' ensel nali'i anama nafe' nakolo'wa dis amama ananiami mafe' etap ea' maselis mamumami lu'wami endilisi mataga etap epes isima ikwaf anama mafin aolupunai nailas ma epes isima sanda' lotuma ambal ananinai.

³Ea' ensel anama nafe'ma bifi wapoti' nafe' nakolo'wa dis ananiami embel naoh lu'wami. Ea' naoh amama mandamboma mataga si'i esimbela epes hiesi saga'i. Ea' amamaga mape nomon naohi maga' hi'alam.

⁴Ea' ensel anama nafe'ma wenifi nakolo'wa dis ananiami embel walemb lu'wami maloma anama embel motah mahagofowa. Embel amama hiami mandamboma mataga esimbel. ⁵Ea' ame' ensel anama numafi embel naohi walemb hiami na'i, "Ine' bu'winai endilisi, nanda' kot ine'inai andeande' naila ikwaf bu'unai atona nawaloga esis sanda' waf aonai. ⁶Dei' main, esis amam nematawa hiesi saha amam nematawa bu'wasi Godi ine'isi afis saloma profet ine'imi wapoti' ea' esimbel اساسimi malo. Ea' dei' nase'asa esimbel epes isima sanda' waf aonai ma sogwa' embel. Ine' nagwamasam mandahama waf aonai esis sanda'anai."

⁷Ea' ame' anona maf nataga balata anama sondolalima Godanai noga na'i, "Endilisi Dembinai, ine' God pepel hianai napainai. Ine' nowaloga epes ma kot ea' kot ine'inai endilisi bu'unai hi'alana."

⁸Ea' ensel anama nafe'ma biamibiama nakolo'wa dis ananiami ma aon alipunai ea' God nape nati owaf naofa epes nif. ⁹Nif amama lu'wami nigisigeim endilisi ma epes isima. Ea' sa'i basef findiwaimi awami ma God numafi amamaga amama awami. Esis ina samboma opalefa sakwaha waf aonai esis sanda'anai ma sefela agel Ananinai, owa'.

¹⁰Ea' ensel anama nafe'ma wanom biami nakolo'wa dis ananiami balata kingi lu'unai anama mafin aolupunai. Ea' owamb lu'unai nataga anama mafin aolupunai nahopogoma. Ea' esis sail waf ananinai sofa' nimaniami lu'wami. Ea' sogwa afegah اساسimi nalelef tilili talala' sondola'wifa sofa' nimaniami lu'wami. ¹¹Esis ukup mapoma nimaniami maloma maselis اساسimi, dei' sa'i basef awami findiwaimi ma God nape heveni. Ina samboma opalef sowa' alafugaha waf anama aonai esis sanda'anai, owa'.

¹²Ea' ensel anama nafe'ma wanom wanomi nakolo'wa dis ananiami walemb lu'unai Yufretis. Ea' walemb embel mafa' hi'alama mondondomba eaf amam king dembemi mufi'i anama aon natefima.

¹³Ea' ati ambagof awami wanom mandati si'i kwahowa lu'wami matagai malogel kwambon anama lu'unai naloma malogel mafin anama

aolupunai naloma malogel profet anama nambaso'ami. ¹⁴ Ambagof amama awami endilisi manda' ikwaf pepel naninani ma esis sotolona sogawana. Amam mafe'ma amam king dembemi mumafi epes hiesi sape wambel hiagomai. Amam ma'i mokolasa amam atogon monda' wandaf nemaf anama lu'unai ma God pepel hianai napainai.

¹⁵ “Peme!! Anona nemaf ae' etagamepa si'i sanda' wali safi'i sataga. Atagamepa anona nemaf ipe' owa' pegawa pi'i ae' iefi'ianai. I'i epes ukup matamea sope sowaho' luwaguf اساسimi andeande'ma owa' so'oh, esis ina sofe' alop atona wahifina solomas siti alop اساسinai ambagof aom, owa'. Isima sondanifel.”

¹⁶ Ea' ambagof awami makolasa king hiami anagon etap tu'wanina diga Hibru'i sa'i Armagedon.

¹⁷ Ensel anama nafe'ma 7i nakolo'wa dis ananiami ea' uf nofa'am. Ea' anona malogel na'i natagai balata king lu'unai nomon ipat lu'unai Godi na'i mehip na'i, “Amama dei' ea' hi'alam!”

¹⁸ Ea' otaga holala nafe', pelele'ala nafe' ea' otaga dililu bugwalagw, sowambon lu'unai nakoto'. Sowambon anama anan lu'unai endilisi ma nimeguf hiami epes sape etapi ina same' anona sowambon nakoto' lu'una fowa' si'i anama, owa'. ¹⁹ Taun anama wambel lu'unai nandawal wenifigin. Ea' wambel hiagoma etap hiagoma kantri awagon hi'alagon. Ea' God okom napoma epes sanda' waf aonai sape taun anama lu'wagoma Babilon, dei' okom ananinai wandafuna nanda' esis sa' embela kap wain nalami nahas kwapete'as. Wain anama womun etina okom wandafunai Godi. ²⁰ Ea' ailan hianai nafa' nafe' higilalana hi'alana ea' ina ata' anona halaf atotona nape, owa'. ²¹ Ea' asaf ondowa lu'wamunai si'i otamba ais afitimi mowai mahas. Asaf ondowa lu'wamunai nimaniami endilisi si'i beg kopi lu'unai atona etin. Ea' sa'ipana awagon God ma asaf ondowa lu'wamunai mowai maha esis.

Nemata'w dembe'wi kwanda' so'a wauli kofa' nimaniami lu'wami

17 ¹ Anona ensel atotona la'afena amam ensel 7-peleim mahapila dis amama 7-peleim nafi'i na'ipi na'ama na'i, “Ine' fi'i! Nemata'w akwama kwanda' so'a wauli kwatoma embel lu'wami ilif anona nemaf kofa' nimaniami lu'wami akwa'umi. Ae' a'i ihi'ambena amama. ² Amam dembemi king etapami manda' waf hianai aonai so'a waolanai maloma nemata'w akwama. Ea' epes etapasi hiesi wapoti' sanda' waf so'a waolanai saloma'w. Ea' sataga sahaga sagaol si'i epes sa' embel wainim la'ifimi ukup mahaga magaal.”

³ Ambal Bu'unai Godi nataga la'ifina ma ae' ame' si'i na'oh nandondo'oh. Ensel anama nofa'e afe' etap wafiguma fatauguma. Anama ati ano'w nemata'w kwatoma anona mafin ilif nape aolupi akwahinai. Mafin anama agof hiami mail alop ananinai hi'alana. Agof amama basef

awami findiwaimi hiami mamumami ma God. Mafin anama balagah 7-peleim mandandana wambawa 10-peleim matagana. ⁴Nemata'w akwama kwala luwaguf akwahimi biam ina mandati na'ama etin, ea' sosaf naninani gol maloma sosaf esis sanda' otamba sanda'anai naloma ombahigis salatamam otamba lu'wami. Akwa'w kwahapila kap gol lagel akwa'unai. Waf hianai aonai nape kap anama nomoni anama. Waf naninani aonai hi'epina endilisi ma naep Godi, waf naninani aonai endilisi ma waf anama so'a waolanai ma nemata'w akwama kwaloma amamaga amama hiami awami mape si'ima kap anama. ⁵Ea' amef akwa'umi ma agel akwa'unai nail amaga akwa'unai. Agel anama basef mandabahi'i ma'i na'ama ma'i, "Taun lu'wagoma Babilon, anama nondofala mama'wawa nematawa hiawai wanda' so'a wauli ma waf hianai aonai endilisi ma etap anae'."

⁶Nemata'w akwama kwaha esis amam nematawa Godi sembale'efa Jisasi sawalapa agel ananinai saga'. Ea' ati akwa'w kwa' esimbel اساسيمي kwataga kwahaga kwagaol. Ati akwa'w gegelalasowe kwapete'e endilisi okom natanea hiahian.

⁷Ea' ensel anama na'ipi na'i, "Dei' maina ine' gegelalasina kwapete'ena? Na'ama owa'. Atuwasi ihi'ambena basef ofagema mape mandambaho'ma nemata'w akwama kwaloma mafin anama nofa'akwi. Mafin anama balagah 7-peleim mapainai ea' wambawa 10-peleim mataganai. ⁸Mafin anama nape aolupi, ine' natolona ea'. Fowa' anan nape, dei' ina ata' nape, owa'. Anona nemaf nokwaha hul anama nowala owa' notambili nolatowi ilif ea' nefe' higililana owa'etin. Enis epes etapasi God ina nanda' agof اساسيمي mape buk ambal namunai ma nemaf anama fowa' dambadamba anan nanda' etap, owa'. Amam nematawa isima anona nemaf siti mafin anama nape aolupi gegelelesis kwapete'as. Dei' main, fowa' anan nape, dei' owa', anona nemaf, anan notaga wapoti'.

⁹Epen emi okom bu'unai napainai, enin nogawa amamaga amama andeande'. Balagah amama 7-peleim basef womun etina halafutagw 7-peleim nemata'w akwama kwatomam. ¹⁰Ea' balagah amama 7-peleim womun etina anom king dembemi 7-peleim wapoti'. Wanom biam ea' maga', anona dei' nape dembinai numafi amamaga. Ea' anona ina dei' nataga dembinai king, ata' owa'. Anona nemaf notaga, anan atona ata' nope dembinai nogota bandata. ¹¹Mafin anama nape aolupi fowa' napani, dei' owa' nopani, anama si'i king dembinai anama nafe'ma 8i. Anan amam wambota atotona naloma king amama 7-peleim ama anona nemaf higiligalana.

¹²Ea' wambawa amama 10-peleim ine' natolom ea'i, amama basef womun etina anom king dembemi 10-peleim. Ina dei' mataga king dembemi, ata' owa'. Ea' amam anona nemaf mofa' pepel moloma mafin anama nape aolupi, motaga king mope dembemi nogota bandata si'i awa

atotona. ¹³Amam king amama ma'li basef mandame'mama ukup etifim ma'li anona nemaf moso' pepel amama amamunai hi'ilana mafin anama nape aolupi ma mome' basef ananimi. ¹⁴Anona nemaf mopa' moloma sipsip noganai. Ea' sipsip noganai nikila'am. Epes saila fala ananinai naloma basef ananimi andeande', isima nandandepas ananisi etis, epes isima anona nemaf la'ifisa solomana sigikila' wandaf anama.”

¹⁵Ea' ensel anama na'ipi na'i, “Ine' natolom embel amama lu'wami nemata'w kwanda' so'a wauli kwatomami. Embel amama basef womun etina esis amam nematawa hiesi epes afa'isi sandatama etifigin sape ea' esis amam nematawa hiesi alop naninani saloma diga hianai naninani hi'ialas. ¹⁶Ea' wambawa amama 10-peleim ine' natulumu, amama moloma mafin anama ukup amamumi wandafuma nemata'w akwama kwanda' so'a wauli. Anona nemaf mofa' amamaga hiahaom maim akwa'umi ma akwa'w ato'w kope etin alupusi a'akw. Ea' mowalima'w luwaguf akwa'umi moha'w koga' mea' ambegw akwa'umi mofa' alop akwa'unai nif fendona hi'ilana. ¹⁷Dei' main, God atona nafela ukup amamumi ma monda' amamaga amama motaga. Fowa' anan na'iam na'i, Anona nemaf amam ukup etifim ea' pepel anama mape dembemi kingi mose'anana hi'ilana nofe'ma mafin anama nape aolupi. Ea' monda'am na'ama etin mefe' motagama nemaf anama God nanda'am mandahama amamaga amama Anan nali' na'iam. ¹⁸Nemata'w akwama ine' natolo'wi, akwama basef womun etina taun anama wambel lu'unai nape si'i dembinai nape nali'ma amam king ma etap anama hiagoma.”

Wambel lu'unai Babilon anama awagon

18 ¹Amama mafe'ma ea', ati anona ensel nakwaha heven nisila'i. Anan pepel napainai endilisi, sosaf ananinai howalagon nanda' etap hiagoma mafifil howalagon. ²Anan noga na'i mehip endilisi na'i, “Nemata'w akwama ao'w hi'alakw. Akwa'w basef womun etina wambel lu'unai Babilon agel lu'unainai awagon hi'alagon! Dei' nataga wambel aonai ma ambagof awami maloma amiguf awami mapaign. ³Dei' main, fowa' esis wambel anama sa'ipa amam nematawa hiesi sasasapa'as sa' wain asasinai numbutinai. Wain anama basef womun etina waf hianai aonai so'a waolanai esis sandanai. Ea' amam dembemi king etapami hiami wapoti' manda' waf anama so'a waolanai maloma esis wambel anama. Ea' epes etapas sanda' bisnis sofa' otamba hiami ma waf naninani aonai esis wambelisi sanda'anai.”

⁴Ea' ame' anona malogel na'i natagai heven na'i, “Ipe' amam nematawa ae'ipei, kwaha wambel anama piwisi ande'. Na'ama ipe' nambimb penda'o'ma peloma wambel anama pefa' nimanimi lu'wami ma waf aonai esis sanda'anai. ⁵Waf anama aonai lu'una endilisi si'i mahanip notawa ilif nalata gani heven. Ea' God okom napoma waf anama. ⁶Ipe'

pegawa waf anama nemata'w akwama kwanda' so'a wauli kwanda'anai. Ipe' pegwa waf akwa'unai dende'ana endilisi piwapanima'w waf wamanai wapoti'. Akwa'w kwakolefa waf aonai kwanda'anai nataga endilisi. Ea' pekolefa nimanimi lu'wami hiami mikila' waf akwa'inai ma pegwam mafe'ma akwa'w. Akwa'w kwamboma embel la'ifimi mala kap anama. Ea' na'ama etin ipe' awi pekolefa embel la'ifimi pese'akwam akwa'w kwea'ama kome' nimanimi awami mogwam mofe'ma akwa'w mondogwama. ⁷Nemata'w akwama kwafela agel akwa'unai atona kwanda' waf hianai naninani ma kope andeande'. Ea' ipe' pese'akw nimanimi hiami akwa'w mondahama aligah mase'akw. Ea' penda' akwa'w konda' kwelef etin. Akwa'w okom na'i na'ama kwa'i, 'Ae' ataga ape kwin dembiwei. Ae' ina si'i alifiwei, owa'. Nimanimi ina nambimb motagame ma elef, owa'.

⁸Ea' amamaga mamumami awami endilisi nambimb motagama wambel anama anona nemaf atotona. Awes lu'unai hianai notaga ea' epes hiesi nambimb selef kwapete' nolomeahas lu'unai notagamas. Ea' nif motaga fendo wambel anama Babilon hi'ilagon. Dei' main, Dembinai God nawaloga wambel anama nagwamasa nimanimi lu'wami esis. Anan pepel lu'unainai la'ifinai endilisi.

⁹Amam king etapami manda' waf so'a waolanai aonai maloma akwa'w ea' manda' waf hianai aonai maloma'w. Nambimb amam king amama miti akwa'w feando'wa nogoh lu'wami motaga'w ea' melef kwapete'. ¹⁰Anona nemaf amam umbamoham kwapete' endilisi ma nimanimi amama akwa'w kofa'ami. Ea' mitu laogona akwa'w mi'iam mi'i, 'Owahipipa owahipipa endilisi ma wambel Babilon! Ipe' taun wambel la'ifinai! Nogota bandana atona si'i aua atotona mehipe' pefa' nimanimi amama ma waf aonai ipe' panda'anai!'

¹¹Ea' epes sape sanda' opeh bisnis etapi ukup mopoma wambel anama ea' solopagon sope opalef nimanimagon sope. Dei' main, ina nambimb enin epen netala hiahaom ananimi wapoti', owa'etin. ¹²Hiahaom maim amama, gol bu'wami satalom otamba hiami siliwa maloma anom otamba bu'wami, ombahigis bu'wami malatamam endilisi, luwaguf bu'wami akwahimi mamumami maloma anom luwaguf silk sahapilam gogwafim maloma lawah amama amamaga alogw bu'wami ma'ami maloma amamaga hiami esis sanda' nalelef elefanim sanda'ami, amamaga amama hiami sanda' lawah satalom otamba lu'wami sanda'ami maloma amamaga sanda' bras howalagon bu'wami sanda'ami maloma amamaga sanda' ain sanda'ami maloma anom amamaga sanda' otamba bu'wami sanda'ami. ¹³Ea' hiahaom na'ama. Lawah nembawa sagwa'ami agilima sinamon maloma paura nogoh alogw bu'womumi maloma gris sa'i mer maloma sanda amama bu'wami frankinsens maloma wain naloma wel sanda' su'utip oliv sanda'ami maloma plaua maloma wit maloma

bulmakau, sipsip, hos maloma karis si'i wilkar maloma epes wapoti'. Epes isima agof a'asi sanda' maol etini sape owina enis epes. Epes isima anom dembemi ma'li esis ina epes bu'wasi. Ea' maso'asas sotalis si'i satal hiahaom maim. Amamaga amama hiami esis ina nambimb satalom wapoti', owa'. ¹⁴Epes sanda' maol bisnis si'ipas na'ama si'i, 'Gwa'aimi amama opalef ipe'imi mohafema pefa'ami, amama hiami makwaha ipe' mafe' ea'. Amamaga hiami bu'wami atom, otamba maim lu'wami atom maloma sosaf maim ipe'imi amamaga hiami amama makwahipa mafe'. Ama ipe' ina piti amama mope wapoti', owa'.

¹⁵Ea' epes isima sanda' bisnis amamaga amama ma sofa' otamba hiami wambel anama esis umbamohas endilisi ma nemanimi awami wambel anama sofa'ami. Esis situ laogona anama opalef nimanim selef sope. ¹⁶Ea' si'i, 'Owahipigin, owahipigin endilisi wambel anama lu'unai Baibilon! Fowa' epes sape wambel anama sala luwaguf sosaf bu'unai atona afitimi maloma luwaguf akwahimi mamumami sofalo'ma alop asasinai ma gol maloma otamba bu'wami maloma ombahigis bu'wami salatamam endilisi. ¹⁷Nogota bandana atona amamaga amama hiami otamba maloma sosaf maim amama ea' aom hi'alam.'

Ea' kepten hiami mumafi sip, maloma epes hiesi satala sip sofe' anona wambel, saloma epes isima hiesi sanda' boskru ma sipi, saloma epes hiesi sanda' maol bisnis naoh embeli, epes isima hiesi situ laogona wambel anama. ¹⁸Nemaf anama situ siti akwa'w wambel anama fendona nogoh molo, ea' si'i mehipe na'ama si'i, 'Wambel lu'unai enima nape nandati na'ama etin si'i wambel anama? Owa'etin.'

¹⁹Ea' esis sela walombuf balagah asasimi sondahomagon selef mehipe opalef aoma wambel anama awagon. Ea' si'i, 'Owahipigin, owahipigin endilisi ma wambel anama lu'unai! Ama amam hiami mumafi sipi maloma amam matala sip mafe' naoh embeli amam mefa' otamba hiami endilisi ma otamba hiami wambel anama. Owahipigin endilisi. Ama nogota bandana atona awagon hi'ilagon!'

²⁰Ipe' pape heven ilifi peloma ipe' amam nematawa Godi paloma ipe' aposel paloma ipe' profet, ipe' hipei pendanifel ma amamaga amama dei' matagama wambel lu'unai anama. Dei' main, God nawaloga wambel anama lu'unai ea' nagwa nimanimi lu'wami ma anama. Anan nagwa waf anama aonai esis sape wambel anama Babilon sanda'anai."

²¹Basef amama hi'alam, ati anona ensel la'ifinai nafela anona owap lu'unai si'i owap lu'unai soka'isa witanai. Anan nafela owap anama nakwahona nafe' nowala embel naoh. Ea' na'i, "Ea' na'ama etin anona nemaf esis sefela wambel anama lu'unai Babilon sokwahogon mehipe notaga awagon nefe' nowa si'i owap anama nowala naoh ama epes ina sotologon wapoti', owa'etin. ²²Ea' gita anama ape' mofala musik anama hianai naninani moloma batagwi alelef, maguf anama ina anona nemaf

ata' peme'am wapoti' wambel anama, owa'. Ea' epes isima gawaisi sanda' opeh mamumami, ipe' ina anona nemaf piti epes isima sope wambel anama wapoti', owa'. Maf owap anama lu'unai noka'isa olelemb witi, anona nemaf ina ata' some' anona wapoti' wambel anama, owa'.²³ Elelowa lamifah ina anona nemaf ata' mififil mope wambel anama wapoti', owa'. Ea' malogel aman anama na'i neaso' nemata'wi o malogel nemata'wi kwa'i kweaso' amani, ipe' ina anona nemaf ata' peme' esis wambel anama wapoti', owa'.

Fowa' epes wambel anama sape sanda' bisnis sape dambesi etapasi. Ea' esis wambel anama sambaso'ma epes hiesi ma aop ufial baso'omunai naninani sanda'ami. ²⁴God nati wambel lu'unai anama naha profet hiami maga' maloma amam nematawa hiesi Godi. Amama atom dei' ofagema mapoma wambel anama. Ea' epes hiesi sape etap anae' esis naumbih sahas saga'i, ofagema amama wapoti' mapoma anama atogon."

Esis amam nematawa Godi sandanifel ma Babilon awagon

19 ¹Amama mafe'ma ea', ame' anom amamaga mame' si'i mif lu'wami esis amam nematawa hiesi sape heven ilifi. Esis sa'i na'ama sa'i, "Ape' mefela agel Godi lu'una! God ape'inei atona nefa' ape' motanimani. Anan agel lu'unainai, pepel lu'unainai, naffili napeinai. ²Basef lu'wami ma kot, anan nawaloga epesa waf endilisinai bu'unai andeande' hi'alas. Nemata'w akwama dembe'wi kwanda' so'a wauli kwasapala esis amam nematawa hiesi etapasi ma sanda' waf aonai so'a waolanai saloma'w. Ea' God nanda'makwa basef. Akwa'w kwaha esis sanda'mana maol Godi saga'. Ea' dei' God nagwama'wa ofagema amama akwa'umi mafe'ma akwa'w."

³Ea' esis sakolasa mif wapoti' na'ama sa'i, "Ape' mefela agel Godi lu'una wambel anama lu'unai fandona nif nogoh malo. Amama malo malata ilif la'ela'ef hihif!"

⁴Ea' amam agufumi dembemi 24-peleim maloma amama biamibiam ambal namunai napaimi mindiwa nembawa balagah motawa manda' lotuma God natoma balata lu'unai. Amam ma'iam mehipe ma'i, "Endilisi, ape' mefela agel Godi lu'una!"

⁵Ama balata lu'unai Godi anona malogel na'i nafi'i na'i, "Ipe' panda'mana maol Godi ma umbamahepama Anan paila basef ananimi, ipe' epes agof a'epa paloma epes isima agufisi, ipe' hipei pekolasa pefela agel Godi! Anan God ape'inai!"

Sipsip noganai naso' nemata'w ea' gwa'aimi lu'wami mataga

⁶Ea' ame' anom amamaga si'i basef hiami matagama epes amam nematawa hiesi sandatama sapani. Sape sa'i mimil si'i embel mowa kululu' etin. Ea' anom amamaga manda'am si'i otaga dilulu bugwalag, maf anama

na'iam mehip na'ama na'i, "Ape' mefela agel Godi! Dembinai anan God ape'inei. Anan pepel hianainai! Dei' anan nataga king endilisi ma numafi amamaga hiami hi'alam. ⁷Dei' ape' mondanifel mefela agel Ananinai. Dei' main, nemaf nataga ea' ma sipsip noganai na'i noso' nemata'w. Ea' nemata'w anani'wi kwandandombol kwape. ⁸God nase'akw luwaguf afitimi bu'wami mafifili endilisi. Akwa'w kwala amama ma alop akwa'unai."

Luwaguf amama mondola'wifa waf bu'unai esis amam nematawa Godi sanda'anai.

⁹Ea' ensel anama na'ipi na'i, "Ine' da'a basef amama. Epes isima God nofalas sofi'mai gwa'aimi lu'wami ma sipsip noganai noso' nemata'w akwama, isima esis sondanifel."

Ea' anan na'ipi wapoti' na'i, "Basef amama basef Godi endilismi."

¹⁰Ea' ae' indiwa nembawa balaga etawa felefele'ma bo'wagah enseli ma enda' lotumana, ea' na'ipi na'i, "Ina nenda'am na'ama, owa'. Ae' alupuwei ine'iwei aloma ine' naloma sahopena ine'imi, afa' wandao'oma wanda' opeh Godi atom waloma esis hiesi sembale'efa basef endilisimi Jisas nawalipasami. Ine' nenda' lotuma God atona. Ape' mogawa basef amama endilisimi Jisas nawalapama ipe'ami, amama mafela amam profet mawalipasa basef Godi."

Anona aman anan Kraiss natoma hos afitinai nafi'i

¹¹Ea' ati otaga heven nandawisi' nogal, ati anona hos afitinai nape. Epen natomanai agel ananinai sa'i, "Epen numafi opeh ananiami andeande', nanda' waf endilisinai atona."

Anan naila waf bu'unai atona nowaloga esis amam nematawa ma basef lu'wami ea' nanda' wandafa waf bu'unai atona. ¹²Naep ananiami si'i nif fandumi ea' hagw bu'wami hiami si'i dembemi king atom mowalo'ami mape balaga Ananinai. Anom amef mail alop ananinai, anama agel ananinai. Anan atona nogawa agel anama, enis epes owa'. ¹³Esimbel masa'opa luwaguf ananiami laumi nalami. Ea' esis sofala agel ananinai sa'i, "Basef Godi." ¹⁴Anan nape nali'ma amam soldia mape heveni matoma hos amama afitimi amamumi mailana mafe'. Alop amamunai esis sowaho'mama luwaguf afitimi bu'wami endilisi. ¹⁵Ea' anona bainat hi'alina endilisi nape malogel Ananinai nawisi ande'. Anan na'i noha amam nematawa hiesi sape etap hiagomai ma bainat anama.

"Anona nemaf Anan numafi epes hiesi sape etap hiagoma. Numafias la'ifina si'i nahapila anona bolam sanda' ain sanda'anai."

Anan nofa'asa su'utip wain ma otam tang anama waini, amama mondola'wifa okom lu'unai wandafunai Godi, Anan la'ifinai ma amamaga hiami. ¹⁶Anom amef agel Ananinai mailana nimbe naloma luwaguf ananiami. Agel anama na'ama. Dembinai king ma amam king hiami, Dembinai ma dembemi hiami.

¹⁷Ea' ati anona ensel naitu felefele'ma aon alipunai nape natalogoma. Anan na'li mehup na'ipa amiguf hiami mufia' mafe' ilif otagai na'i, "Ipe' pindowa'anima pifi'mai gwa'aimi anama lu'wami Godi! ¹⁸Ama pea' alop amam king dembemi noloma mafis amam kepten mumafi amam soldiai moloma mafisa amam amama dembemi la'ifimi moloma mafis hosi moloma mafis epes hiesi satumami wapoti'. Ipe' pea' mafis epes hiesi hi'ilas na'ama. Epes hiesi, enis agof a'asi sanda' opeh sape owina enis epes, enis agufisi sumafi enis epes sanda' opehi, enis dembesi agufisi, enis agof a'asi."

¹⁹Ea' ati mafin anama lu'unai nape aolupi naloma dembemi king amama etapami maloma soldia amamumi mandatama mape. Amam ma'li mopa' moloma aman anama natoma hos afitinai naloma soldia ananimi. ²⁰Aman anama natoma hos afitinai nikila' mafin anama nape aolupi naloma profet anama nawalapa basef baso'maimi nikila'am nanda'am manda' kalabus. Profet anama fowa' nanda' pepel si'i God atona nanda'anai ma naep mafin anama nape aolupi. Waf anama atona nambaso'ma epes sofa' ikwafa mafin anama nape aolupi ea' sanda' lotuma ambal atona ananinai. Mafin anama naloma profet anama nambaso'ami amam biam ata' mape ambagof namumi sokwahom mafe' nif lu'wami fandom otam batafumi agel salfa hul lu'unai nowala owa' notambili. ²¹Anom soldia maila mafin anama aolupunai maloma profet anama nambaso'masi, amam ata' mape. Ea' aman anama natoma hosi naha amam soldia amamumi maga'. Anan naham bainat anama launai nape malogel ananinai. Ea' amiguf hiami mafi'i ma' alop amamunai ea' opelef amigufi elihim endilisi.

Satan nanda' kalabus nape afagof 1,000-peleim

20 ¹Ea' ati anona ensel nakwaha heven nisila'i. Anan nahapila ki utainai ma hul anama launai nogal nowala gani ma owa' notambili. Ea' nahapila sen lu'unai wapoti'. ²Anan nahapila kwambon anama du'utinai la'ifinai, kwambon anama fowa'inai endilisi. Anan "Aman nambaso'ma epes hiesi." Anan Satan. Ea' ensel anama nowa'ana sen nape nanda' kalabus nandahama afagof 1,000-peleim. ³Ensel anama nakwahona nafe' nowala hul anama launai ea' nowalowamana uta ilif la'ifina. Ea' Satan ina anona nemaf la'ifina ma nombaso'ma amam nematawa hiesi wapoti', owa'. Anan ata' nope nohafa afagof 1,000-peleim ama ata' hi'ilam ea', ensel anama notagahona wapoti' nefe'agon ganigani ma nogota bandana.

⁴Amama mafe'ma ea', ati anom balatagw lu'wami kingi ma'oh ea' enis epes satoma balatagw amama. God nase'asa agel lu'unai ma sowaloga waf esis amam nematawa hiesi sanda'anai ma kot. Ea' ati ambagof epes isima hiesi. Esis owa' sonda' lotuma mafin nape aolupi naloma ambal

ananinai sambalonai, ea' owa' sofa' ikwaf aonai mafin anama amagah lagof asasimi. Epes isima sembale'efa basef Godi la'ifis sawalapa basef endilisimi Jisasi. Waf anama atona sanda' opeh bu'wami, dei' esis naumbih satopa' bagafowas afis. Sohafel wapoti' sofa' ambal namunai sope dembesi king soloma Kraisi sope sondahama afagof 1,000-peleim. ⁵Nemaf anama nili'i ma esis saga'i sili' sohafel hi'aglif. Ea' epes isima fowa' saga'i ina sofa' ambal namunai nemaf anama, ata' owa'. Esis ata' sope sohafa afagof amama 1,000-peleim mefe'ma hi'ilam. ⁶Epes isima sotanima sohafel nemaf anama nali'i, esis sandanifel sope bo'wes andeande'. Ea' ga' anama niegi'i ina la'ifina nohagofa epes isima, owa. Esis sope pris Godi sope pris Kraisi sondolalimam. Ea' sope dembesi soloma Kraisa sumafi enis epes afagof 1,000-peleim.

Satan nokwaha kalabus nogota bandana ea' nofa' nimanimi endilisi

⁷Afagof amama 1,000-peleim hi'ilam, uta nindausi' ma kalabus ea' Satan nokwaha kalabus ananimi nuwisi ande'. ⁸Anan nuwisi ande'ma nombaso'ma epes amam nematawa hiesi sape etap anae' hiagoma biefigin biefigin nafe' notambela, esis epes hiesi Gok saloma Magok. Ea' Satan nokolasa esis sonda' wandaf. Epes hiesi asasisi isima hiesi sandahama wesana'oh naoh akata. ⁹Ea' sefe' ganima etap hiagoma laogoma sondowasa' saitu tulif sindiwapagon anama amam nematawa Godi sapoma, anama wambel taun anama God okom ma'iana endilisi. Ea' nif misila'i heven fando soldia amama Satani hi'alam. ¹⁰Amama mataga ea', God nokwaha aman anama Satan nambaso'masi nefe' hul anama nowala owa' notambili nif fandom lu'um otam salfa la'ela'ef mapani. Amam ensol mali' makwaha mafin nape aolupi naloma profet anama nambaso'ami mowala mape hul anama. Amam biam moloma Satan mope anama la'ela'ef hihif mofa' nimanimi owamb alip anama nif fandumi mapoma.

God nawaloga epes sanda' waf aonai saga'i ma basef lu'wami

¹¹Ea' ati balata lu'unai kingi afitinai notawa, anona aman natoma balata anama. Etap anae' naloma otaga ilif mafe'ma Anan ea' owa' anagon ma amam mopaigon, owa'. Epes hiesi ina anona nemaf sotolom wapoti, owa'. ¹²Ea' ati esis saga'i sape, epes isima agufisi saloma isima agof a'asi saitu naep balata kingi. Ea' aman anama natoma balata anama nefa' anom buk ea' naufam. Ea' naufa anona buk wapoti', agof esis sofa' ambagof namumi mailanai. Ea' nati amef mail buk amama, ma'i maina waf esis sanda'anai nawaloga esis saga'i sandahama waf hianai esis sali' sanda'anai. ¹³Wambel saga'i sapoma naloma naoh embel makwaha epes isima saga'i sotanimani ma nogota anama. Ea' Anan natoma balata kingi nawaloga esis hiesi atona etin sandahama waf hianai esis sanda'anai. ¹⁴Ea' nakwaha ga' naloma

wambel saga'i sapoma mafe' mowala hul anama launai nif lu'wami fandumi mapeinai. Hul anama si'i ga' nafe'ma bifi notagama epes hiesi. ¹⁵I'i Anan natoma balata kingi owa' nietai agel anin epeni nope buk anama, nefelen nokwahin newala hul anama nif amama fandumi mapeinai.

Etap naloma otaga mataga dambaim

21 ¹Dei' ae' ati etap naloma otaga dambaimi mape. Heven ilif naloma etap apimi mafe' higilalam hi'alam. Ea' naoh wapoti' ina ata' motah, owa'. ²Ea' ati taun wambel bu'unai Godi, anama Jerusalem dambaiguma. Ati taun anama nape naloma God, nakwaha heven ilif nisila'i. Wambel anama nanda' sosaf bu'unai atona nandandombol si'i nemata'w kwa'i koso' amani kwanda' sosaf bu'unai atona ma koso' aman akwa'unai. ³Ea' ame' anona malogel nataga balata kingi na'i mehup na'ama na'i, "Peme! Dei' ipat lu'unai Godi notawa naloma epes. Ama Anan nope la'afena esis ma sope amam nematawa ananisi ea' Anan nope God esis sanda' lotumanai. Endilisi, God Anan atona nape nalomas. ⁴Anan anona nemaf nopati'masa embif hiami ma naep asasimi. Ama ina anona nemaf sogai' wapoti' opalef nimanim ea' esis ina selef some' nimanimi wapoti', owa'etin. Dei' main, amamaga amama fowa'imi mafe' mowala higilalam hi'alam."

⁵Ea' aman anama nape balata lu'unai kingi na'i, "Peme! Dei' Ae' anda' amamaga hiami mataga dambaim hi'alam!"

Ea' na'ipi wapoti' na'i, "Ine' da'a basef amama. Dei' main, basef amama endilisimi atom ma sembale'efam endilisi."

⁶Ea' na'ipi wapoti' na'i, "Ae' anda' amamaga amama dambaimi hiami mataga hi'alam. Ae' atowe ape Dembiwei la'ela'ef hihif ape ali' ape agi' endilisi. Ae' ofagewe ma ahapila amamaga hiami hi'alam ea' ape agi' anda' opeh hiami ae'ami hi'alam. Emi egafis si'i iap nose'as, anona nemaf ese'as embela ifata embel ambal namunai napaimi. Ea' ese'asam na'a si'i presen bu'unai. ⁷Emi egafis situ la'ifisa sili'amona wandafa waf aonai, esis anona nemaf sofa' amamaga amama hiami bu'wami do'ok a'ipipami. Ea' ae' epe God asasisiwei, esis sope awasi ae'asi.

⁸Epes isima umbamahasa sotanima, isima owa' sombale'efa Godi, epes sanda' waf naninani aonai endilisi soloma epes isima saha enis saga'i soloma epes isima sanda' waf aonai so'a waolanai soloma isima sanda' mu'uhupi soloma epes isima sanda' lotuma god anama baso'mainai, soloma epes isima hiesi sambaso'omi, epes isima hiesi sofa' wambel asasinai ma hul anama lu'unai nif lu'wami fandumi otam salfa napoma. Hul anama launai si'i ga' nigi' neatagai."

Jerusalem dambaiguma

⁹Ea' anona ensel nafi'mai ae'. Ensel anama atotona ma amam ensol 7-peleim mahapila dis amamaga mahambombaga epesi malami

mandandam. Amamaga amama awami meagi'i endilisi. Anan na'ipi na'i, "Ine' fi'i, ma ihi'ambena nemata'w sipsip noganai waulu'mana." ¹⁰ Ea' Ambal Bu'unai Godi nafela okom ae'anai, ensel anama nofa'e afe' alata anona halaf launai gani ilif. Ea' nihi'ambe taun wambel anama bu'unai Godi Jerusalem, anama nape naloma God ea' nakwaha heven nafi'i ata' nisila'i etin.

¹¹ Wambel anama nafifili la'ifinai si'i nagwapin Godi mafifil taun anama. Elelowa nafifili Ananinai anona nafifili si'i otam bu'unai satalona otamba hiami. Endilisi, nafifili anama si'i otam jaspera pelele' endilisi si'i glas. ¹² Taun anama endaleleb lu'wami laumi endilisi malata ilif. Endaleleb amama utagw 12-peleim ea' ensel 12-peleim maitu felefele' mandandama utagw amama. Ea' agof amama mandahama wambotagw 12-peleim esis Israeli mail mandandama utagw amama. ¹³ Endaleleb wa'am titi gani wa'ol aon natefima utagw wanom. Ea' wa'ol aon natopa' nonafama sanda' utagw wanom ea' gani aon natopa' nomba'ma sanda' wanom ea' wa'ol aon nowalama naso'ma sanda' wanom. ¹⁴ Endaleleb amama ma taun anama, otamba lu'wami 12-peleim mape mosohapa endaleleb etapama. Ea' agof amam aposel 12-peleim sipsip noganai mail mandanda otamba amama.

¹⁵ Ea' ensel anama nalome na'i nahapila bandan gol si'i ikwaf nosaho' taun anama ma endaleleb naloma utagw.

¹⁶ Taun anama lu'wagoma. Endaleleb amama dindiwaisa biefigin biefigin ea' usi'im endilisi. Wambel anama tef wala, wa'ol wa'ol na'ama etin. Ensel nosaho'agon nondola'wifa taun anama ma ikwaf ananinai ea' wambel anama tef wala ikwaf nataga 2,400 kilomita. Ea' wa'ol wa'ol biefigin biefigin tasa ikwaf na'ama etin 2,400 kilomita. Wambel anama dogwala owin nalata nataga ilif, ikwaf anama nataga na'ama etin 2,400 kilomita. ¹⁷ Anan nandandepa endaleleb nondola'wif wapoti' etap nalata nataga ilif. Ea' ikwaf endalelembi nikila' nataga 144 alogof bandami mita. Mita anama, anan si'i epes sondola'wifa hiahaomanai si'i rula. Ea' ensel nondola'wifa endaleleb amama ma ikwaf anama atona. ¹⁸ Endaleleb mili'akwa tauni amama God atona nanda'am otamba amama jaspera. Ea' taun anama God nanda' gol atom nanda'ana. Taun anama howalagon nafifil endilisi si'i glas. ¹⁹ Endaleleb owinama ma taun anama, God nofalo'mama otamba mamumami bu'wami sataloma moni hianai. Otam gologowinai bu'unai nali'i nombalo' endaleleb owinama agel jaspera. Otam nagi'i kolotu'unai agel sapaia. Ea' anona nagi'i ma wanomi afitinai agel aget. Ea' anona nafe'ma biefinai biefinai ulitinai agel emeral. ²⁰ Ea' anona nafe'ma wanom biefinai agel sandonikis, anama anan nanda' apohi akwahina afitina. Ea' nafe'ma wanom wanom anan akwahinai agel konilian. Ea' nafe'ma 7-peleinau batafunai agel krisolait. Ea' nafe'ma 8-peleinau anama ulitinai anom mandati na'a agel beril.

Ea' anona nafe'ma 9-peleinai batafunai nandati na'a agel topas. Ea' anona nafe'ma 10-peleinai agel krisopres anama nanda' apoh batafunai ulilitinai. Ea' nafe'ma 11-peleinai anona kolotu'unai nandati na'a agel haiasin. Ea' anona nafe'ma 12-peleinai anama anona akwahinai agel amatis. ²¹Utawg amama 12-peleim si'i ombahigis afitimi 12-peleim salatamam endilisi. Anona uta sanda'ana anona bahigin lu'unai atotona. Taun anama eaf atotona. Eaf anama gol atom mafifili howalagon pelege' endilisi si'i glas sanda'ana.

²²Ae' ina ati ipat Godi lu'unai sanda' lotuwanai notawa taun anama, owa'. Dei' main, Dembinai God la'ifinai nikila' la'ifimi hiami hi'alami naloma Sipsip Noganai, amam biam mape si'i ipat lu'unai Godi ma taun anama. ²³Ea' taun anama aon owambunai alipunai maol nanda'anai owa' ma wambel anama howalagoma, owa'. Dei' main, mafifili lu'wami Godi atom mumafiagon manda'agon howalagon. Ea' Sipsip Noganai anan atona si'i nagwapin anama. ²⁴Epes etapasi hiesi hi'ilas anona nemaf sofa' nafifili atoma taun anama ea' sefe'. Ea' amam king mumafi etapi anona nemaf mofa'ai sosaf otamba maim amamumi mifi'mai wambel anama. ²⁵Alip esis ina sowalo utagwa endaleleb amama, owa'. Magal la'ela'ef mape. Dei' main, owamb ina aonona nemaf notaga taun anama wambel lu'unai, owa'. ²⁶Sosaf bu'unai noloma otamba moni maim ma'oh wambel kantri hiagoma epes hiesi anona nemaf sofa'am suwisa wambel anama sombe'am. ²⁷Ea' amamaga awami moloma epes emi sanda' waf naninani aonai soloma emi egafis sa'i basef baso'maimi soloma emi egafis sanda' waf aonai nanda' epes ambagof aom, epes isima ina sefe' siwisa wambel anama, owa'. Sipsip Noganai nanda' agof enis epesi mail buk anama agof epes sofa' ambal namunai mailanai, epes isima etis anona nemaf sefe' suwis wambel anama.

**Embel walemb maloma lawag epes sogwa'am
sofa' ambal namunai sope la'ela'ef**

22 ¹Ea' ensel anama nihi'ambe anona walemb lu'unai. Walemb anama howalagon pelege' endilisi si'i glas. Walemb anama nandambe nafi'i balata lu'unai Godi natomanai naloma balata lu'unai Sipsip Noganai natomanai ea' kolo' etin nafe'. ²Walemb anama nafe' la'afena eaf lu'unai ma taun wambel anama lu'wagoma. Walemb fisana fisana lawah biam ambal namunai motawa. Amam mail mola su'utip danda la'ela'ef mandanda aomb atona etina afagof hiami atona etin. Nohotagw 12-peleim mandahama aomb 12-peleim. Emi egafis sogwa' su'utip amama, esis sofa' ambal namunai sope andeande' la'ela'ef. Soh apulima monda' epes hiesi awes nanda'asi sape kantri hiagoma sotaga bo'wes. ³Wambel anama amamaga hiami God nandaiwa'mam endilisi ma na'i nili'amonami, amama ina nambimb mope wapoti', owa'.

God noloma Sipsip Noganai, amam anona nemaf motoma balata lu'wami kingi mope mumafi epes isima. Esis sanda' opeh Godi sope sonda' lotumana sefela agel ananinai. ⁴Anona nemaf siti amaga Ananinai ma nonda' agel ananinai nil amagah اساسيمي. ⁵Anona nemaf owamb ina notaga wapoti', owa'. Ea' ina ata' anom mafifili moloma lam nogwahis o owaf aon alipunai, owa'. Amama opeh a'am. Dei' main, Dembinai God nififima esis, sope si'i king sumafi enis epes la'ela'ef.

Anona nemaf Jisas nifi'i mehip

⁶Ea' ensel anama na'ipi na'ama na'i, "Basef amama hiami mape buk anae' endilisimi atom andeande'ma epes hiesi sombale'efam. Dembinai God naso' Ambal Bu'unai Ananinai amam profet. God Anan nasapa'ai ensel Ananimi ma mihi'amba esis sanda' maola Anani ma amamaga amama felefele' meatagai."

⁷Ea' Jisas na'i, "Peme! Anona nemaf Ae' ifi'mai ipe' mehip. Basef Godi mape buk anae', basef amama amamaga hiami ma'i anona nemaf migi' meatagai. Emi egafis sila basef amama, esis sondanifel."

⁸Ae' Jon ame' basef amama ati amamaga amama ame'am ea'. Ea' indiwa nembawa etawa felefele'ma ensel anama nihi'ambe amamaga amama ma enda' lotuma anan. ⁹Ea' ensel anama na'ipi na'i, "Ine' owa' nenda'am na'ama, owa'. Ae' ina dembiwei, owa'. Ae' alomena wandao'oma wanda' opeh etini waloma sahopena ine'imi profet fowa'imi maloma epes isima hiesi saila basefa buk anae'. Ine' nenda' lotu ma God atona."

¹⁰Ea' na'ipi na'i, "Basef amama Godi mape buk anama, ina nembaho'am nesapamam mope, owa'. Dei' main, nogota God na'i nonda' amamaga amama, anama felefele'ma notaga hi'ilana. ¹¹Emi egafis sonda' waf aonai, esis sonda'ana la'ela'ef. Emi egafis sonda' waf aonai endilisi, esis sonda'ana la'ela'ef. Emi egafis sonda' waf bu'unai, esis sonda'ana la'ela'ef. Ea' emi egafis sepe epes bu'wasi Godi, esis sope bo'wes Ananisi na'ama etin la'ela'ef."

¹²Ea' Jisas na'i, "Peme! Anona nemaf Ae' etaga mehip. Ea' ifi'i eloma amamaga bu'wami awami, ewaloga esis amam nematawa hiesi egwamasam atona etin mondahama waf esis sanda'anai. ¹³Ae' atowe ape Dembiwei la'ela'ef, ape ali'i ape agi' endilisi. Ae' ofagewe ma amamaga hiami enda'am efe' efe' embefam andeande' hi'ilam.

¹⁴Esis amam nematawa sasa'opa luwaguf اساسيمي ma sataga bo'wes, esis sondanifel. Esis isima anona nemaf God na'i esis bo'wes ma sefa' gwa'aيمي ma lawag anama ambal namunai napainai ea' la'ifisa sefe' suwis uta anama ma wambel anama bu'unai. ¹⁵Epes sanda' waf aonai si'i bogof nombagw manda'anai soloma epes isima sanda' mu'uhupi, epes isima sanda' waf aonai so'a waolanai soloma epes saha enis saga'i

soloma epes isima sanda' lotuma god baso'mainai soloma epes isima hiesi ukup maila waf baso'omunai maimailana, epes isima anona nemaf sope ande'ma wambel anama Godi.”

¹⁶Ea' Jisas na'iam wapoti' na'i, “Ae' asapa' ensel ae'anai nafe'mago ipe' ma nowalapa basef amama ma ipe' sios amam nematawa Godi. Ae' atowe ae' dapana nandala nombaf lawag Deviti, bafalomana ananiwei ataga wambota ananinai. Ae' si'i ondo'w anama lala'wan mafifili endilisi nalatawi kuhimbita.

¹⁷Ambal Bu'unai Godi naloma nemata'w Sipsip Noganai nose'akwi esis sa'i, 'Ipe' fi'i!' Ea' emi egafis seme' basef amama, esis si'i basef amama atom si'i, 'Ipe' fi'i.' Ea' emi egafis iap nose'asa embel, esis sifi'i. Emi egafis sa'i sogwa' embel, esis sifi'i sea' embel ambal namunai napaimi si'i presen bu'unai God nose'asana na'ai, owa' sotalona otambai.

¹⁸Ipe' epes emi egafipa pame' basef Godi ma amamaga amama mail buk anae' anona nemaf meatagai, Ae' a'ipa ipe' hipei mehip, ipe' pindumafuma andeande'. I'i emi egafis siwatani anom basef wapoti' moloma basef Godi, anona nemaf amamaga amama aom endilisi God na'iami ma buk anae', amama anona nemaf God nokolefamanam esis. ¹⁹I'i emi egafis sogagaha anom basef tu'wanim Godi ma'i amamaga anona nemaf meatagai ma nili'amonama buk anae', anona nemaf God nili'amona epes isima nogalo'mas. Ea' esis ina anona nemaf la'ifisa sefa' gwa'aيمي ma lawag anama ambal namunai napaimi, owa'. Anona nemaf ina la'ifisa sefe' sepe andeande' wambel anama bu'unai buk anae' na'iaigoma, owa'etin.”

²⁰Ae' Dembiwei a'i basefa amamaga mail buk anae', Ae' a'i amama endilisimi atom. Ea' dei' a'i, “Endilisi, Ae' anona nemaf ifi'i mehip!”

Endilisi, Dembinai Jisas, ine' nifi'!

²¹Ae' a'i Dembinai Jisas nigiangamepa na'a nope nolomepa, ipe' God Ananipei. Endilisi.